



www.eee-books.com

لتحميل المزيد من الكتب والمراجع باللغة العربية

تابعونا على

موقع عالم الهندسة الكهربائية

www.eee-books.com

جروب عالم الهندسة الكهربائية على الفيس بوك

www.facebook.com/groups/EEE.Arabic

الطبعة
الأولى

سلسلة الهندسة بالعامية

لغير المتخصصين
الهندسة الإلكترونية
الجزء الأول

أحمد أبو الفتوح



الهندسة الإلكترونية (ج ١)

للأطفال وغير المتخصصين

أحمد أبو الفتوح

2019

رقم الإيداع : ٢٠١٩/٥٣٧٥

الترقيم الدولي : ٣ - ٦١٧٣ - ٩٠ - ٩٧٧ - ٩٧٨

حقوق الطبع و النشر محفوظة للمؤلف؛ ولا يجوز نشر هذا الكتاب أو جزء منه أو إعادة طبعه أو اختزان مادته العلمية بأي طريقة سواء كانت إلكترونية او ميكانيكية او بالتصوير أو خلاف ذلك دون موافقة خطية وكتائية من المؤلف؛ ومن يخالف ذلك يعرض نفسه للمساءلة القانونية.

إهداء

أهدي هذا الكتاب لذوي الفضل عليّ ومربع النجاح خاصتي ..

الام والخال و الاخ والزوجة ..

أسأل الله أن يديم نعمتكم عليّ .. وأن يجعل هذا

العمل في ميزان حسناتكم .. وأسأله تعالى أن

يعينني على بركم وأن يجمعنا في الجنة جميعا

بغير حساب أو سابقة عذاب..



مقدمة الكتاب

الحمد لله حمدا كثيرا مباركا فيه ..

بعد عدة اصدارات للكتب الهندسية المتخصصة باللغة الانجليزية؛ اخذت قرار انى ابدأ فى تأليف الكتب الهندسية باللغة العربية كحلقة ضمن حلقات حلم قديم بالعمل على تعريب العلوم الهندسية.

اخذت القرار بان مؤلفاتى القادمة هتكون ما بين الفصحي (للكتب التخصصية) و العامية (لغير المتخصصين) والاكتفاء بالمنتوج السابق من الكتب التخصصية باللغة الانجليزية واللى كنت بألفها بالاساس لتيسير على طلابي من كليات الهندسة المختلفة و اكسابهم مهارات و دراية بالسوق المحلي والعالمي والتطبيق العملي ودا اللى صعب ألقيه فى المراجع والكتب الاكاديمية الثانية لعظماء الهندسة فى مختلف المجالات.

الكتاب دا موجه لغير المتخصصين اللى حابين يتعرفوا اكر على مجال الهندسة الالكترونية واللى العلم بيه بيكون أساسى لدخول عالم الروبوت و البرمجة التطبيقية والذكاء الاصطناعي المرتبط بهياكل مادية.

حاولت قدر الامكان ابسط المعلومات اللى فيه و اكتفى بالجزء اللى يهمك من المعلومة النظرية مع غض الطرف عن المعلومة الاكاديمية العميقة اللى هتصعب عليك فهم المادة العلمية ومش هتحتاجها الا فى الاعمال البحثية اللى مفروض يقوم بيها متخصصين مميزين.

بدأت معاك بالكلام عن الكهرباء وتوضيح مفهوما و طرق توليدها وانتهيت بتصنيع دوائر الكترونية مطبوعة زى اللى بتشوفها فى الاجهزة



الالكترونية والكهربية بالظبط .. مرورا بالكلام عن العناصر الالكترونية والدوائر الالكترونية و المغناطيسية و الاى سيهات وغيرها من اساسيات الهندسة الالكترونية.

تعمدت انى ازاحم الكتاب بكثير من الامثلة والتجارب و المسائل المبسطة المحلولة؛ ناهيك عن عدد كبير من الدوائر زى دوائر كشف الكذب و دوائر طرد الناموس و دوائر التحكم فى الاضاءة واستشعار الحرارة والحساسات وغيرها. الهدف من المشاريع الكثيرة دى انك تدرس المادة العلمية بشكل تطبيقي عملي وكمان لو انت اب ممكن ببساطة تطبق الكلام دا مع ابنك لاكسابه شغف المعرفة وحب الهندسة؛ جزء مهم جدا من تربيتنا لأولادنا يعتمد على زرع حب العلم فى عقولهم وقلوبهم منذ نعومة الاظافر .

قدمت الكتاب فى حجم متوسط ليسهل حمله فى اى مكان.. بحيث يكون وسيلة فعالة لشغل اوقات الفراغ فى حال ركوب المواصلات او اوقات الانتظار فى المصالح الحكومية و بين الحصص والمحاضرات وغيرها ..

اسأل الله ان تجدوا هذا العمل نافعا متقنا .. وأن يكون مقدمة لانتاج ضخم باللغة العربية فى مجال العلوم الهندسية.

أحمد أبو الفتوح



أحمد أبو الفتوح

فهرست المحتويات

مقدمة

٩	الفصل الاول : (ايه هي الكهرباء؟!)
١٣	الكهرباء الساكنة
١٥	الكهرباء المتحركة
١٦	الكهرباء بتيجي منين؟!
٢٠	طاقة الرياح
٢١	الطاقة المائية
٢٢	الطاقة الشمسية
٢٣	الطرق الكيميائية لتوليد الكهرباء
٢٥	الطاقة النووية
٣١	الفصل الثاني : المغناطيسية
٣٢	حدوتة المغناطيس
٣٤	قدرة المغناطيس على اختراق المواد
٣٥	أنواع المغناطيس
٣٩	علاقة المغناطيس بالكهرباء
٤٠	فكرة عمل الموتور الكهربى



٤٥	الفصل الثالث : الكميات الكهربائية وطرق قياسها
٤٨	قانون اوم
٥٠	الافوميتر
٥١	مكونات الافوميتر
٥٢	قياست الفولت المستمر
٥٣	قياس الفولت المتردد
٥٥	قياس المقاومة
٥٦	قياس التيار المستمر والمتردد
٦١	الفصل الرابع : الدائرة الكهربائية واهم العناصر
٦٢	ايه هى الدائرة الكهربائية !!؟
٦٣	المقاومة
٦٤	المقاومات الثابتة
٦٦	المقاومات المتغيرة
٦٩	المقاومة الضوئية
٧٠	المقاومة الحرارية
٧١	ازاي نعرف قيمة المقاومة
٧٥	طرق توصيل المقاومات
٧٨	المكثفات
٨٠	قراءة قيم المكثفات
٨٣	الموحدات
٨٥	الترانزستور
٨٦	المحول (الترانس)



الفصل الخامس : خطواتك الاولى فى الدوائر ٩٥**الالكترونية**

- ٩٦ لوحة التجارب
 ١٠٣ دائرة التحكم فى الاضاءة اوتوماتيكيا
 ١٠٥ دائرة ضوء سيارة الشرطة

الفصل السادس : رموز العناصر الالكترونية ١١١

- ١١٢ عناصر القدرة والتوصيل
 ١١٤ المقاومات
 ١١٥ المكثفات والملفات
 ١١٧ الموحدات
 ١١٨ الهوائيات
 ١١٩ المفاتيح
 ١٢١ الترانزستورات
 ١٢٣ اللمبات
 ١٢٤ المحولات

الفصل السابع : الحساسات ١٢٩

- ١٣٠ انواع الحساسات الكهربائية
 ١٣١ مقياس مستوي ماء فى خزان
 ١٣٥ انذار من ارتفاع شدة الحرارة
 ١٣٨ مقياس شدة الحرارة
 ١٤٠ حساس اهتزاز
 ١٤٢ دائرة كشف الكذب



١٤٩	الفصل الثامن : الدوائر المتكاملة (الآي سي)
١٥٢	ايه هي الدوائر المتكاملة!!؟
١٥٣	سبب اختراع الای سي
١٥٦	الدائرة المتكاملة 78xx
١٥٧	طريقة توصيل الای سي 78XX
١٦١	عيوب عيلة 78xx و 79xx
١٦٢	المؤقت ٥٥٥
١٦٣	شرح اطراف المؤقت ٥٥٥
١٦٥	مميزات المؤقت ٥٥٥
١٦٨	دائرة مضاعف الجهد
١٧٠	دائرة حساس ضوء
١٧٢	دائرة كشف المعادن
١٧٥	دائرة طرد الناموس
١٧٧	دائرة اشارة المرور
١٧٩	دائرة التشويش على الريموت كنترول
١٨٧	الفصل التاسع : الدوائر المطبوعة
١٨٩	طرق تصنيع الدوائر المطبوعة
١٩٠	طريقة التحميص البسيط





الفصل الأول

ايه هي الكهرباء؟؟!



الفصل الأول : ايه هي الكهرباء؟!!

قبل ما نعرف ايه هي الكهرباء .. محتاجين نعرف ايه هي الذرة !!

كل حاجة فى الكون اما كائنات حية او جماد؛ الجماد اللي مفيهوش روح زي الحديد والبلاستيك و النحاس و الهواء و المية.


كل حاجة من الحاجات دى بتتكون من جسيمات صغيرة جدا اسمها (**جزيئات**) كل جزيئ بيتكون من جسيمات اصغر منه اسمها (**ذرات**).

الذرة شبه المجموعة الشمسية اللي بتتكون من الشمس و حوايها كواكب بتدور فى مدارات معينة. الذرة بتتكون من النواة اللي جواها جسيمات اسمها (**بروتونات ونيوترونات**) وبتدور حوايها جسيمات اسمها (**الكترونات**) .

ربنا لما خلقنا خلق كل حاجة وعكسها علشان يبقى فيه توازن؛ خلق الرجال والست؛ الضوء والظلام؛ الحر والبرد؛ الشمال والجنوب .. إلخ .

وعلشان تكون الذرة متوازنة فالالكترونات بتكون شحنتها سالبة (-) والبروتونات بتكون شحنتها موجبة (+)؛ اما النيوترونات فبتكون متعادلة لا موجبة ولا سالبة.






الصورة بتوضحك شكل الذرة البروتونات الموجبة (باللون الاحمر) و النيترونات المتعادلة (باللون الاصفر) و الالكترونات السالبة (باللون الازرق).

الذرات بتتجمع مع بعضها علشان تعمل جزيئات اى مادة؛ وممكن مجموعة ذرات تتحد مع بعضها بأعداد مختلفة فتكون مواد مختلفة.

يعني مثلا لو جينا ١ ذرة اكسجين + ٢ ذرة هيدروجين وجمعناهم مع بعض هنعمل جزيء (ماء) اللى احنا بنشربها.


ولو جينا ٢ ذرة اكسجين + ٢ ذرة هيدروجين وجمعناهم مع بعض هنعمل جزيء (ماء اكسجين) اللى بيستخدم فى التعقيم وصبغات الشعر.

جزيء ماء الاكسجين



ذرتين هيدروجين + ذرتين اكسجين

جزيء الماء



ذرتين هيدروجين + ذرة اكسجين




كل ذرة سيكون حواليها عدد معين من الالكترونات وجواها نفس عدد البروتونات وفي الجدول دا مثال لبعض الذرات

عدد البروتونات الموجبة	عدد الالكترونات السالبة	الذرة
١	١	الهيدروجين
٨	٨	الاكسجين
١٧	١٧	الكلور
١١	١١	الصوديوم
٢٦	٢٦	الحديد
٢٩	٢٩	النحاس

لو قدرنا نقل او نزود عدد الالكترونات فى الذرة بتتحول لأيون:

- ١- أيون موجب : لو كان عدد البروتونات (الموجبة) أكبر من عدد الالكترونات (السالبة)
- ٢- أيون سالب : لو كان عدد الالكترونات (السالبة) أكبر من عدد البروتونات (الموجبة)



دا بالطبط اللي بيحصل لما تدوب ملعقة ملح طعام (**كلوريد الصوديوم**) فى كباية ماء. جزء الملح بيتحلل لأيون صوديوم (+) و لأيون كلور (-).
ونفس الكلام دا بينطبق على الجزيئات (المكونة من مجموعة ذرات)

ايه هو التيار الكهربى ؟

التيار الكهربى ببساطة هو تدفق الالكترونات من ذرة للتانية من اول السلك لأخره؛ ودا السبب اللى بيخلينا نسمي الاجهزة الكهربية (**اجهزة الكترونية**) !!

أنواع الكهرباء

الكهرباء بتنقسم لنوعين رئيسيين :

- ١- الكهرباء الساكنة (**الاستاتيكية**).
- ٢- الكهرباء المتحركة (**الديناميكية**).

الكهرباء الساكنة

قبل ٢٦٠٠ سنة لاحظ الفيلسوف اليونانى (**طاليس**) ملاحظة غريبة جدا. انه لو قام بحك حجر كهربان بقطعة من القماش هيقدر حجر الكهربان يجذب ريش الطيور والملابس القطنية والصوفية والورق!!



تجربة (١-١)

هات قلمك الجاف و حكه فى شعرك او فى اى شي تيرت صوف وبعدين
قربه من اى قطعة ورق صغيرة هتلاقيه بيحبها زى المغناطيس بالظبط !!

الكهرباء الساكنة بتكون عبارة عن زيادة او نقصان لعدد الالكترونات
الاجمالى لمادة معينة؛ فمثلا باحتكاك القلم بالصوف بتنتقل اليه الكترونات
وتتجمع على سطحه ودا بيخليه قادر على جذب الورق فيما بعد.

الكهرباء الساكنة فى حياتنا بنشوفها بشكل دائم .. البرق مثلا ماهو الا
كهرباء ساكنة .. الكترونات متجمعة فى السحب وبتحاول تفقدها
فبتبعثها للارض فى صورة البرق.

كمان لو عندك ملابس من ألياف صناعية (**زى النايلون**) بتلاحظ عليها دايمًا
انها بتلزنق فى بعضها بفعل الكهرباء الساكنة.

ولو كان عندك شعر فى ايدك وقربت من شاشة التلفزيونات القديمة
هتلاقى الشعر بيقف وينجذب لشاشة التلفزيون.. واحيانا لما بتمسك جسم
معدني (**زى مقبض الباب مثلا**) بتحس بكهرباء خفيفة او بتحصل شرارة.



لاحظ شعر الطفل المنجذب الى هيكل اللعبة المشحونة



الكهرباء المتحركة


بتختلف الكهرباء المتحركة عن الساكنة بأنها بتكون عبارة عن مجموعة شحنات متحركة مش مستقرة على جسم مادة معينة؛ والنوع دا من الكهرباء هو اللي بنستخدمه فى حياتنا عموماً لتشغيل الاجهزة الالكترونية والسيارات الكهربائية والمعدات والماكينات والمصابيح وغيرها.

بتنقسم الكهرباء المتحركة لنوعين :

١- **تيار مستمر** : وفى النوع دا بيكون فرق الجهد ثابت فى القيمة والاتجاه؛ بالظبط زي بطارية السيارة او الريموت كنترول ؛ بنقول بطارية السيارة ١٢ فولت مستمر.. ودا معناه انها مش ممكن تتغير من ١٢ ل ٥ فولت مثلاً وبعدها ترجع تاني لـ ١٢ فولت وبعدين ترجع ٥ فولت وهو دا الثبات فى القيم؛ الثبات فى الاتجاه معناه انها مينفعش تتغير من + ١٢ فولت لـ - ١٢ فولت.

٢- **تيار متردد** : ودا النوع اللي بيتغير فيه فرق الجهد فى القيمة والاتجاه؛ والنوع دا اللي موجود فى البيوت والمصانع وبنشغل بيه الاجهزة الكهربائية والمعدات الكبيرة والصغيرة؛ هتلاقى مكتوب على اى جهاز الكتروني عندك (**التليفزيون مثلاً**) ٢٢٠ فولت ٥٠ هيرتز .. ودا معناه ان فرق الجهد بيتغير من + ٢٢٠ لـ - ٢٢٠ مرة فى الثانية الواحدة.





ملحوظة : التيار المتردد شبيه تماما بأمواج البحر ؛ جزء من الموجة يكون مرتفع وجزء ثاني يكون منخفض؛ ولو لاحظت قارب موجود في المية هتلاقيه يطلع وينزل مع الموجة؛ ارتفاعه وانخفاضه هنا زي ارتفاع وانخفاض فرق الجهد في الكهرباء المترددة.

الكهرباء بتيجي مين؟!



كلنا ركبنا عجل واحنا صغيرين؛ عادة يكون في العجلة (**دينامو**) اشبه بالموتور الصغير بياخد حركة من العجلة الخلفية ويحولها لتيار كهربائي يغذي الكشاف او الفانوس في مقدمة العجلة؛ نفس فكرة دينامو السيارة.





الدynamo او (المولد) شبيه جدا بالموتور الكهربى، لكن الموتور بنديله طاقة كهربية وناخذ منه طاقة حركية (دورانه)؛ أما المولد فعكس الموتور .. بنديله طاقة حركية يحولها لطاقة كهربية. ودا أساس معظم طرق توليد الطاقة الكهربائية.




بشكل أساسي يتم توليد الكهرباء فى محطات ضخمة بتقدر تنتج كهرباء كافية لتغطية مدن كاملة فى محيطها؛ المحطات دى بتعتمد على الوقود التقليدي زى الفحم و البنزين و السولار والغاز الطبيعي كوقود لانتاج الكهرباء.




علشان نولد كهرباء فى المحطة محتاجين ندور مولد (دينامو) كبير جدا جدا .. ودا بيتم عن طريق اننا بنستخدم الوقود فى تسخين الماء لحد ما يغلى ويتحول لبخار درجة حرارته وضغطه عاليين جدا؛ بعدها بيدخل على مراوح المولد فيحركها ونتيجة دورانها بتتولد الكهرباء اللي بتغذى البيوت والمصانع.

بعدها البخار دا بيتحول جزء منه لمام فيحتاج نكثفه علشان يتحول كله لمام تاني وبعدين نسخنه علشان يرجع كله بخار بضغط وحرارة عاليين وندخله على مراوح المولد تاني.. وهكذا.



بعد توليد الكهرباء بنحتاج نظبط الجهد والتردد الخاص بيها وبعدين نقلها من محطة التوليد لحد البيوت ودا بيتم عن طريق محولات و ابراج ضغط عالي من خلال ٥ خطوات :-

- ١- توليد الكهرباء.
- ٢- رفع الجهد عن طريق محولات رفع.
- ٣- النقل من خلال ابراج الضغط العالي (مسافات بعيدة).
- ٤- خفض الجهد عن طريق محولات خفض.
- ٥- النقل من خلال اعمدة الانارة للمنازل (مسافات قريبة).



معظم الكهرباء التي بتوصلنا في البيوت والمصانع بتتولد بالطريقة دي؛ لكن فيه طرق تانية لتوليد الكهرباء زي الطاقة المتجددة و الطرق الكيميائية والنوية.

توليد الكهرباء من الطاقة المتجددة

طاقة الرياح



مفيش حد فينا ملعبش بالمروحة الورق دي في يوم من الايام شكل المروحة بيخليها تدور لما تمر عليها نسمة هواء .. دا بالضبط اللي بيحصل في محطات توليد الكهرباء باستخدام الرياح.



المحطات دي بتكون عبارة عن ابراج عالية جدا لان كل ما ارتفعنا اكثر عن الارض كل ما الرياح بقت اقوى. الابراج بيكون مثبت عليها مولدات متركب فيها مراوح (تربينات) الرياح بتخليها تدور فتدور المولدات وبالتالي ناخذ منها الكهرباء.




نفس الفكرة تم استخدامها من مئات السنين في صورة الطواحين الهوائية التي كانت منتشرة في الريف الاوروبي والتي كانت تعتمد على الرياح في تدوير مراوحها وبعدين بتتنقل الحركة للطاحونة عن طريق تروس متشابكة بتخليهم في الاخر قادرين على طحن كميات كبيرة من القمح والذرة لانتاج الدقيق.



الطاقة المائية

بنفس مبدأ عمل طاقة الرياح بنقدر نولد الطاقة الكهربائية من خلال استغلال تدفق المياه ودا يحصل بأكثر من طريقة على سبيل المثال في السد العالي مركبين ترينينات ضخمة اشبه بالساقية بتنزل عليها المياه من خلف السد تحركها وتمر من خلالها للنيل. وبكدا المولدات بتقدر تولد طاقة كهربائية.



كمان فيه مولدات شبيهة جدا بأبراج الرياح لكن بتشتغل تحت المية؛
مراوحها بتدور بسبب تدفق المية بدل تدفق الرياح زي ما واضح فى
الصورة.



الطاقة الشمسية

ودي احد اشهر طرق توليد الكهرباء من مصادر متجددة؛ بنستخدم فيها
خلايا شمسية.



الخلايا بتكون مصنوعة من **السيلكون** بشكل اساسي مضاف اليه بعض الشوائب وتتكون من طبقتين بينهم اسلاك كهربية؛ لما بينزل عليها ضوء الشمس بتولد كهرباء بين الطبقتين وبتنتقل من خلال الاسلاك اللي بينهم وبعدين تخرجلنا.

ممکن نستخدمها بشكل مباشر وممكن نخزنها فى بطاريات لاستخدامها بالليل فى الوقت اللي ميكونش فيه شمس لتوليد الكهرباء.

الطرق الكيميائية

ودى بالظبط اللي بنشوفها فى البطاريات الجافة و بطارية العربية؛ منها انواع كثير جدا بتعتمد على تفاعلات كيميائية بين مجموعة مختلفة من المعادن والاحماض والقلويات. ودايما بنحصل على تيار مستمر من النوع دا لتوليد الكهرباء.



نماذج مختلفة من البطاريات




البطاريات تتكون عادة من إلكترود موجب و الكترود سالب و بينهم وسط بنسميه (**الكتروليت**) مهمته نقل الالكترونات بينهم .. عادة الوسط دا يكون موصل جيد للكهرباء بحيث يسهل مرور الالكترونات من الالكترود اللى هيفقدها للالكترود اللى هيكتسبها .

تجربة (٢-١)

اصنع بطارية باستخدام ليمونة!!

هات ليمونة اغرس فيها مسمار من الحديد و سلك من النحاس و وصل بينهم لمبة صغيرة هتلاقيها بتنور !! و ممكن توصل أفوميتر و تقيس فرق الجهد (فى الفصل التاني بنشرح ازاي تستخدم الافوميتر).



لكن خذ باك انك علشان تشحن البطارية محتاج تمددها بتيار كهربى .. وبالتالي البطاريات هى عناصر لتخزين الكهرباء اكثر منها توليدها!



الطاقة النووية

توليد الكهرباء من خلال الطاقة النووية يختلف كثير عن عملية توليدها باستخدام السولار او الغاز الطبيعي؛ لكن الاختلاف يكون في مصدر الحرارة التي بتحول الماء لبخار بضغط وحرارة عاليين جدا بحيث تقدر تدور الرتبيانات التي متوصلة بالمولد.



الذرة زي ما عرفنا بتتكون من نواة فيها بروتونات ونيوترونات وحواليها الكترونات. لو قدرنا بطريقة ما اننا نكسر الذرة دي بحيث نفصل مكوناتها عن بعضها هتتولد درجة حرارة كبيرة جدا جدا.

هتستغرب لما اقولك ان الطاقة النووية هي ارفع انواع الطاقة تقريبا ودا لان سعر المواد المستخدمة فيها رخيصة نسبي بالنسبة لكمية الطاقة التي بتولدها؛ المواد التي بتستخدم كوقود ذري او نووي بتكون مواد مشعة زي اليورانيوم .



المشكلة فى الطاقة النووية ان تكلفة انشاء المفاعلات النووية بتكون مرتفعة جدا؛ لكن بمرور الوقت ومع انخفاض تكلفة تشغيل المحطات النووية بنعوض التكلفة الكبيرة دى. كمان فيه مشاكل صحية ممكن تتسبب فيها المحطات النووية لان بيبقى من الصعب التخلص من النفايات النووية بعد استخدامها ودى بتكون ضارة جدا لانها بتصدر اشعاعات خطيرة بتسبب السرطان.



هديك حدوتين متعلقين بالطاقة النووية

الحدوتة الاولى : سنة ١٩٨٢ حصلت مشكلة فى احد المفاعلات النووية الاربعة اللى فى مدينة تشرنوبل الاوكرانية؛ تم اصلاحها والتكتم عليها تمام. لكن بعد ٤ سنين (١٩٨٦) حصلت مشكلة كبيرة. ان درجة الحرارة فى قلب احد المفاعلات ارتفعت جدا و اتعطلت دورة التبريد اللى بتحمي القلب من الانصهار؛ بعدها انصهر قلب المفاعل و حصل انفجار ضخم جدا



يعادل ٢٠٠ انفجار من اللي سببته القنابل الذرية اللي ألقها امريكا على مدينتي هيروشيما وناجازاكي فى اليابان فى الحرب العالمية الثانية.
من سنة ١٩٨٦ لحد النهاردة (اكثر من ٣٠ سنة فاتت على الانفجار) لسة مدينة تشرنوبل مهجورة ومحظور على البشر السكن فيها بسبب ضرر الاشعاعات النووية اللي لسة موجودة من وقت الانفجار!!

الحدوة الثانية : اليابان معروفة بالزلازل والبراكين؛ لكن سنة ٢٠١١ حصلت كارثة كبيرة فى اليابان بسبب زلزال بلغت قوته تقريبا ٩ ريختر !! الزلزال تسبب فى حدوث شروخ واعطال فى ٤ مفاعلات نووية فى محطة فوكوشيما . وحصل تسريب اشعاعي كان لازم يتم اصلاحه بسرعة فى نفس الوقت كل اللي هيداولوا اصلاح الاعطال دى هيتعرضوا لكمية كبيرة من الاشعاعات هتجيبهم سرطانات بعد سنوات قليلة على احسن تقدير.

هنا حصلت حاجة عظيمة جدا. تطوع اكثر من ٢٥٠ مهندس وفني طاقة نووية اعمارهم فوق الـ ٧٠ سنة لاتمام عملية الاصلاح. قالوا انهم كبروا جدا فى السن و اصبحوا على وشك الموت فالافضل انهم يضحوا بنفسهم بدل مهندسين وفنيين المفاعلات اللي هيبقوا معرضين للموت فى شبابهم. دا غير ان تاثير الاشعاعات على كبار السن اقل من الشباب وكمان قالوا انهم بيتحملوا المسؤولية كاملة لانهم هم اللي دخلوا الطاقة النووية اليابان من البداية.



اتنين طلاب ..

الأول قرر يذاكر مادة معينة من ١٠ مراجع كل مرجع ٦٠٠ صفحة .. وليل نهار بيذاكر
علشان يقدر يخلص المراجع دى قبل الامتحان.

التاني فهم ترتيب المادة كويس .. فهم ايه مطلوب منه كويس .. فهم ازاي ممكن
يحصل على المعلومة بأقل مجهود .. فقدر يجيب كتاب صغير ٥٠ صفحة في خلاصة
كل المراجع دى.

الاتنين دخلوا الامتحان .. الأول كان مجهد اوى من كتر المذاكرة ومقدرش يخلص
المنهج .. والتاني خلصه بسرعة ونام كويس قبل الامتحان وبالتالي حل كويس وجاب
درجات اعلى من الأول .. مع انه تعب اقل منه بكثير!!

لو سألتك تحب تكون أي شخص فيهم قطعاً هتقول التاني .. قرارك سليم..

الصحابة كانوا بيعملوا كدا لانهم كانوا مدركين ان حياتهم اقصر من انهم يجمعوا
جبال الحسنات اللى بيطمحوا اليها .. كان الواحد منهم بيعدد النوايا للعمل الواحد
وبيؤجر - بإذن الله - على كل نية لوحدها .. بعضهم كان بيعقد اكثر من ٧٠ سنة
للمشى للصلاة في المسجد ..

تخيل وانت بتقرأ الكتاب دا مثلاً ممكن تعقد نية طلب العلم .. نية
انك بتشغل وقتك فبالتالى تبعد عن ذنوب الخلوات .. نية انك
تكون مصدر قوة للبلد والدين .. نية انك توسع مداركك وبالتالي
تقدر تربى اولادك فيما بعد كويس .. إلخ.

هي دى الشطارة!!



الفصل الثاني


المغناطيسية



الفصل الثاني : المغناطيسية!!

المغناطيسية مرتبطة جدا بالكهرباء علشان كذا خصتلك فصل خاص بيها؛ فى الفصل دا هتفهم المغناطيسية بشكل اعماق و هنعمل سوا مجموعة من التجارب ؛ وطبعاً كلها أمانة تماماً ومناسبة للصغار والكبار.

ابسط مثال يوضحك العلاقة بين المغناطيس والكهرباء هو ان معظم المولدات الكهربائية اللي بنحصل من خلالها على كهرباء بتعتمد بشكل اساسي على المغناطيس اللي جواها فى توليد الطاقة " **ودا اللي هنفهمه بعد كذا بالتفصيل** " ؛ وكمان معظم المواتير بيكون فيها مغناطيس.



حدوتة المغناطيس بدأت من ٣٠٠٠ سنة على ايد احد رعاة الغنم اسمه (ماجنيز) فى بلدة صغيرة فى اليونان اسمها (ماجنيزيا). كان بيرعى غنمه بعصاية من الحديد؛ وضعها على حجر اسود وقعد جنبها شوية ولما حاول



يشيلها من فوق الحجر علشان يروح مكان ثاني واجه صعوبة كبيرة جدا
فى رفعها!!

بعد شوية محاولات فهم الراعي ان الحجر الاسود دا هو السبب فى ان
عصايتة بتجذب له ويصعب فصلها عنه وان الاحجار الثانية فى محيطه
متجذبش ليها العصايتة. كمان اكتشف ان الحجر دا بيجذب له الحديد بس
اما الخشب والقماش و النحاس فمبيأثرش فيهم .. ومن وقتها وبنسميه (**مغناطيس**)
نسبة لاسم الراعي او اسم بلده.

المغناطيس بيتوفر فى اشكال كثيرة جدا منها اللى على شكل قرص
مستدير او على شكل مستطيل او على شكل حدوة حصان وغيرها من
الاشكال .




لكن العامل المشترك فى كل اشكال
المغناطيس هو انها بتتكون من
قطب شمالي "عادة بيكون لونه
أحمر" وقطب جنوبي "عادة بيكون
لونه أزرق او رصاصي".

المغناطيس بيقدر يجذب معادن مختلفة زي الحديد والكوبلت و النيكل
لكن لما نقرب مغناطيسين من بعض ممكن يتجاذبوا وممكن يتنافروا ودا
بيكون على حسب وضعهم.



لو حطيت القطب الشمالي فى المغناطيس الاول امام القطب الشمالى فى المغناطيس التانى والجنوبى امام الجنوبى هتلاقى المغناطيسين بيبعدوا عن بعض لأن الاقطاب المتشابهة بتتباعد او تتنافر.

ولو حطيت القطب الشمالى فى المغناطيس الاول امام القطب الجنوبى فى المغناطيس التانى والجنوبى فى الاول امام الشمالى فى التانى هتلاقى ان المغناطيسين بينجذبوا لبعض بشدة ودا لأن الاقطاب المختلفة تتجاذب.



تأثير المغناطيس الواضح بيكون على عدد معين من المواد زى الحديد والكوبلت والنيكل لكن العلماء بيقولوا انه بيأثر على كل المواد تأثير احنا مبنحسش بيه؛ وبعد سنين من البحث قدروا يصنعوا اجهزة معقدة بتعتمد على المغناطيس لفحص جسم الانسان زى أشعة الرنين المغناطيسي.

قدرة المغناطيس على اختراق المواد

المغناطيس يقدر يخترق المواد ويجذب اللي وراها بشكل مذهل؛ لكن قدرته على جذب المواد فى الحالة دى بتعتمد على اقدر من حاجة زى قوة المغناطيس نفسه و سمك الحائل و ونوعه.



تجربة (٢-١)

هات مغناطيسين .. حط بينهم ورقة وشوف هينجذبوا لبعض ولا لا ..
 كرر نفس التجربة باستخدام لوح زجاج او كاس زجاجي و كوب بلاستيك و
 طبق سيراميك و غلاف كتاب و اى مادة تانية تشوفها اداملك ..

أنواع المغناطيس


فيه ٣ انواع رئيسية للمغناطيس (طبيعي - صناعي - كهربى)

المغناطيس الطبيعي


ودا اللي موجود فى الطبيعية زى الحجر الاسود اللي اكتشفه الراعي قبل
 ٣٠٠٠ سنة ودا عبارة عن حجر من اكسيد الحديد الممغنط وله القدرة
 بشكل طبيعي على جذب المعادن المغناطيسية.

المغناطيس الصناعي

ودا بيتم تصنيعه بطرق كثير منها اننا
 بنجيب قطعة من المعدن ونعرضها لمجال
 مغناطيسي قوى جدا فيحولها لمغناطيس؛
 ومنها اننا بنجيب قطعة من المعدن و نقوم
 بحكها فى مغناطيس تاني قوى لمدة
 ثواني فبتتحول لمغناطيس.



تجربة (٢-٢)



هات مسمار ومغناطيس وذلك
المسمار بالمغناطيس فى اتجاه
واحد كذا مرة؛ بعدها قرب
المسمار من مجموعة مسامير
تانية هتلاقية اتحول لمغناطيس
وقدر يجذبهم!!

المغناطيس الكهربى

ودا نوع جديد من المغناطيس وله استخدامات كثير جدا؛ هتلاقية موجود
جوة المواتير و بيستخدموه فى التقاط الحديد الخردة بأوزان كبيرة وفي
قفل الابواب وغيرها من التطبيقات. بيكون عبارة عن ملف من سلك نحاس
جواه قلب من الحديد لما بنوصله كهرباء بيعمل مجال مغناطيسي ويتحول
لمغناطيس كهربى مؤقت؛ ولما بنفصل عنه الكهرباء بيرجع تانى لحالة
الطبيعية وبيفقد مغنطته.

تجربة (٣-٢)



هات بطارية و مسمار و سلك ؛ لف السلك
حوالين المسمار و وصل اطرافه بالبطارية ؛
قرب المسمار من دبابيس حديد هتلاقية
اتحول لمغناطيس وقدر يجذبها!!



الحقل المغناطيسي



الحقل المغناطيسي هو المنطقة حول المغناطيس وبتظهر فيها قوته وتأثيره على المواد في محيطه؛ نقدر نشبه الحقل المغناطيسي او المجال المغناطيسي بالمنطقة اللى فيها ضوء حوالين عامود انارة فى الشارع؛ اكثر منطقة مضيئة بتكون حوالين العامود وكل ما تبعد عن العامود الضوء بيقل لحد ما يختفى خالص.

نفس الكلام موجود فى المغناطيس بالظبط؛ المجال بيكون قوي جدا على جسم المغناطيس وكل ما نبعد المجال بيضعف لحد ما يتلاشى.

نقدر نمثل الحقل المغناطيسي بخطوط خارجة من القطب الشمالى وداخلى القطب الجنوبى ونقدر نشوفها ببساطة لو عملنا التجربة الجاية بنفسنا.

تجربة (٢-٤)


هات برادة حديد و وزعها على ورقة سميكة؛ وبعدين هات مغناطيس وحطه تحت الورقة .. هتظهر لك خطوط الفيض وشكل الحقل المغناطيسي.



من المعلومات التي يمكن تبقى غريبة عنك ان كوكب الارض عبارة عن مغناطيس كبير جدا. له قطب شمالي وله قطب جنوبي؛ واي مغناطيس اقطابه بتفاعل بشكل مدهش مع اقطاب الارض وبالطريقة دي قدرنا نضع البوصلة التي بيستخدمها البحارة في تحديد الاتجاهات في البحر (الشمال والجنوب والشرق والغرب).



صورة البوصلة المغناطيسية



تجربة (٢-٥)

هنعمل بوصلة .. هات دبوس وقطعة من الفلين ومغناطيس و طبق فيه ماء. مغنت الدبوس بحكه في المغناطيس لمدة ثواني وبعدين ثبتته في الفلين ..

حط قطعة الفلين بالدبوس في طبق الماء هتلاقيها بتعوم على سطحه وبتدور لحد ما الدبوس يشاور على اتجاه الشمال والجنوب.. حاول تغير اتجاهها هترجع تاني تشاور على اتجاه الشمال والجنوب.



ازاي تبوظ مغناطيس !!؟

ببساطة **سخنه**؛ الحرارة بتفقد المغناطيس المغنطة وبتخليه معدن عادى خالص غير قادر على جذب اى معدن تاني.



كمان ممكن تبوظه **بالطرق** عليه .. هات شاكوش واخبط عليه وبعد شوية هتلاقى انه فقد مغناطيسيته و مبقاش قادر على جذب الحديد.

ايه علاقة المغناطيس بالكهرباء؟


زى ما شوفنا قبل كدا اننا لو وصلنا سلك ملفوف حول مسمار حديد بالكهرباء هيعمل مجال كهرومغناطيسي ويتحول لمغناطيس نقدر نشيل بيه المسامير و الدبابيس .. ولو حجمه كبير شوية ممكن نشيل بيه عربيات كاملة.

كمان لو عكسنا الفكرة و مررنا مغناطيس بالقرب من ملف نحاسي هتتولد كهرباء بين طرفين سلك الملف لان المجال المغناطيسي الخاص بالمغناطيس هياثر على السلك ويولد فيه كهرباء .



تجربة (٦-٢)

هات سلك نحاس اعمله ملف بالشكل اللي فى الصورة؛ هات مغناطيس على شكل قضيب و حركه داخل قلب الملف. ركب لمبة صغيرة بين طرفين السلك او استخدم افوميتر لقياس الجهد الكهربى هتكتشف ان تحريكك للمغناطيس داخل الملف بيولد كهرباء فيه!! وممكن تستبدل الافوميتر او اللمبة ببوصلة فى نهاية السلك هتلاقيها بتتأثر بالمجال الكهربى للتيار المتولد جوة السلك وبتتحرك!!




فكرة عمل الموتور

اتفقنا قبل كذا ان المغناطيس له قطبين شمالي وجنوبي؛ وان الاقطاب المتشابهة تتنافر والاقطاب المختلفة تتجاذب. وكمان قدرنا نعمل مغناطيس مؤقت باستخدام الكهرباء وملف من النحاس. وهو دا بالضبط الموتور.

الموتور الكهربى البسيط بيتكون من قلب داخلى دوار عليه ملفات نحاس؛ وجسم خارجى مثبت عليه مغناطيس دائم.






لما بنوصل تيار كهربى لملفات النحاس اللى على القلب الدوار بتتحول لمغناطيس؛ وبسبب تشابه واختلاف الاقطاب بين قلب الموتور و جسمه .. بنلاقى ان القلب بيدور وبكدا قدرنا نحرك الموتور .

عكس الفكرة لما بنولد الكهرباء .. بنجيب مولد شبه الموتور؛ وندور القلب بتاعه بالرياح او البخار او موج البحر او اى طريقة زى ما شرحنا قبل كذا .. فيعمل مجال كهرومغناطيسى فى الملفات النحاس بيتقاطع مع المجال المغناطيسى للمغناطيس الدائم و بيولدنا الكهرباء.

تجربة (٧-٢)



اصنع موتور بسيط بنفسك .. هات سلك نحاس اعمل منه ملف من عدد لفات كبير زى اللى فى الصورة .. دخل اطراف الملف فى ثقبين ابرتين خياطة .. ثبت ابرتين الخياطة فى اطراف بطارية جافة .. وقرب

مغناطيس من الملف النحاس او ثبته بين البطارية و الملف .. هتلاقى الملف بيدور !!



إيك والحزن..

الحزن هيسببك ضعف .. شتات .. فتور .. انطواء .. اكتئاب .. اجهاد ذهني ونفسى .. هياتر على علاقتك مع ربنا و علاقاتك الاجتماعية ..

الحزن احد اكثر اسلحة الشيطان فاعلية .. ربنا بيقول (**ليحزن الذين آمنوا**) وبيقول (**لا يحزنك الذين يسارعون فى الكفر**) وبيقول (**فلا يحزنك قولهم**) و بيقول (**ولا تهنوا ولا تحزنوا**).. حتى ان النبى صلى الله عليه واله وسلم لما كان بيتكلم عن انواع الرؤى .. ذكر ان من الرؤى رؤيا من الشيطان لالباسك لباس الحزن والهم .. واحد اشهر الادعية الماثورة عنه (**اللهم انى اعوذ بك من الهم والحزن**)..



الفصل الثالث

الكميات الكهربائية وطرق قياسها



الفصل الثالث : الكميات الكهربائية!!

اهم ٤ مصطلحات محتاج تعرفهم فى الكهرباء : فرق الجهد الكهربى -
شدة التيار الكهربى - المقاومة الكهربائية - القدرة الكهربائية


تخيل ان فيه ماسورة نازلة من الدور العاشر لحد الدور الارضى .. ضخيت
فيها سائل .. ايه هيجصل للسائل ؟ أكيد هينزل تحت ..

طب تخيل انك جيت عند الدور الخامس و عملت محبس وقفلته شوية .. ايه
هيجصل للسائل ؟ هيمر بس بكمية اقل ..

الكلام دا بيحصل فى الكهرباء بالظبط

- الماسورة هي السلك اللى بتمشى فيه الشحنات الكهربائية
- الارتفاع بين الدور العاشر للدور الارضى هو فرق الجهد الكهربى اللى بيخلى التيار الكهربى ينتقل من الجهد المرتفع للجهد المنخفض.
- السائل اللى فى الماسورة هو الشحنات الكهربائية وكمية السائل اللى بتمر فيها هو شدة التيار الكهربى.
- اما بقى بالنسبة للمحسب اللى بيعيق حركة السائل ويخليه يمر بكمية اقل فهو المقاومة الكهربائية.
- اما القدرة الكهربائية فنقدر نعبر عنها بحاصل ضرب الجهد الكهربى \times شدة التيار الكهربى.





بطريقة ثانية ممكن نقول ان فرق الجهد (الاصفر) هو اللي يبزق التيار الكهربى (الاخضر) علشان يمشى فى السلك والمقاومة (الاحمر) هى اللي بتحاول تمنع التيار انه يمشى.

فى الجدول دا هتلاقى رمز و وحدة قياس كل كمية

وحدة القياس	الرمز	الكمية
الفولت Volt	V	فرق الجهد الكهربى
الامبير Amber	I	شدة التيار الكهربى
الأوم Ohm	R	المقاومة الكهربائية
الوات Watt	P	القدرة الكهربائية



قانون اوم

قانون اوم هو اهم قوانين الهندسة الكهربائية؛ القانون دا بيوضح العلاقة بين فرق الجهد و المقاومة وشدة التيار.

قانون اوم $\text{فرق الجهد} = \text{شدة التيار الكهربى} \times \text{المقاومة الكهربائية}$

مثال

جهاز كهربى مقاومته الكلية ١٠٠ اوم يمر به تيار كهربى شدته ٢.٢ امبير فكم يكون فرق الجهد المغذى للدائرة ؟

الحل :

فرق الجهد = شدة التيار \times المقاومة

$$= 2.2 \times 100 = 220 \text{ فولت}$$



مثال

تليفزيون منزلي يعمل بجهد كهربائي قيمته ٢٢٠ فولت ومدون عليه ان مقاومته الكلية ٢٠ اوم. فكم تبلغ شدة التيار المار به ؟

الحل :

فرق الجهد = شدة التيار × المقاومة

(نقسم الطرفين ÷ المقاومة)

$$\text{شدة التيار} = \frac{\text{فرق الجهد}}{\text{المقاومة}} = \frac{220}{20} = 11 \text{ امبير}$$

مثال

غلاية شاي شغالة بجهد كهربائي قيمته ٢٢٠ فولت ومكتوب عليها انها بتستهلك ١٠ امبير .. احسب قيمة مقاومتها.

الحل :

$$\text{المقاومة} = \frac{\text{فرق الجهد}}{\text{شدة التيار}} = \frac{220}{10} = 22 \text{ أوم}$$



الأفوميتر



الافوميتر هو الاداة اللى بنقدر نقيس بيها الكميات المتعلقة بالكهرباء
زى فرق الجهد وشدة التيار و المقاومة وغيرهم.

موجود من الافوميتر نوعين رئيسيين : أنالوج و ديجيتال

- الافوميتر الانالوج : بيكون فيه مؤشر لقياس قيمة الكمية اللى
عايزين نقيسها اشبه بمؤشر السرعة فى السيارة.
- الافوميتر الديجيتال : ودا بيكون فيه شاشة رقمية بتظهر النتائج
مكتوبة بشكل مباشر وبيكون ادق وافضل من الافوميتر الانالوج.

هنتعلم مع بعض فى الفصل دا ازاي نستخدم الافوميتر فى قياس الكميات
المختلفة و هنطبق الكلام دا عملي على افوميتر ماركة DT9205A مع
العلم ان كل الافوميتر الديجيتال متشابهة جدا فى طريقة استخدامها
وخصائصها.



مكونات الافوميتر




قياس الفولت المستمر

علشان نقيس الفولت (فرق الجهد) للتيار المستمر محتاجين نوصل اطراف التوصيل الخاصة بالافوميتر بالشكل اللى فى الصورة رقم ١ ونظبط وضع سيلاكتور الافوميتر على القيمة فى الصورة رقم ٢



صورة رقم ٢



صورة رقم ١

بعد كدا هنجيب بطارية قلم (١.٥ فولت) ونوصلها بالشكل دا و نشوف القراءة على شاشة الافوميتر




ملحوظة مهمة جدا : احنا اختارنا الوضع (فولت مستمر - ٢ فولت) لاننا عارفين ان الجهد بتاع البطارية ١.٥ فولت يعني واقع بين ٢٠٠ مللي فولت (٠.٢ فولت) و ٢ فولت.
لو منعرفش قيمة الجهد ممكن نبدأ بأعلى جهد ولو مطلعش قراءة نقلل شوية بشوية.

قياس الفولت المتردد

علشان نقيس الفولت (فرق الجهد) للتيار المتردد محتاجين نوصل اطراف التوصيل الخاصة بالافوميتر بالشكل اللى فى الصورة رقم ١ ونضبط وضع سيكتور الافوميتر على القيمة فى الصورة رقم ٢



صورة رقم ٢



صورة رقم ١



بعد كذا هنوصل اطراف التوصيل فى مصدر التيار الكهربى و نشوف
القراءة على شاشة الافوميتر



ملحوظة مهمة جدا : احنا اختارنا الوضع (فولت متردد - ٧٥٠
فولت) لاننا عارفين ان فرق الجهد لكهرباء المنازل ٢٢٠ فولت
يعني واقع بين ٢٠٠ فولت و ٧٥٠ فولت.

مهم جدا تبقى مركز وانت بتعمل التجربة دى وتاخذ بالك ان
صوبك متمسش اطراف التوصيل وغير مسموح للاطفال بعملها
بدون اشراف الاباء.




قياس المقاومة

علشان نقيس المقاومة محتاجين نوصل اطراف التوصيل الخاصة بالافوميتر بالشكل اللي فى الصورة رقم ١ ونظبط وضع سيكتور الافوميتر على القيمة فى الصورة رقم ٢



صورة رقم ٢



صورة رقم ١

بعد كذا هنجيب بطارية قلم (١.٥ فولت) ونوصلها بالشكل دا و نشوف القراءة على شاشة الافوميتر




قياس التيار المستمر والمتعدد

التيار يختلف عن الكميات الثانية في طريقة قياسه؛ علشان نقيسه بنبدل اطراف التوصيل في الافوميتر و نظبط وضع البكرة على قياس التيار سواء مستمر (باللون الأبيض) او متردد (باللون البرتقالي) وبنوصلين الطرفين توالى في الدائرة.

كأننا قطعنا سلك في الدائرة و وصلنا طرفيه بأطراف الافوميتر!!



صورة رقم ٢



صورة رقم ١

اخترنا الوضع (تيار مستمر - ٢٠ ملي امبير ملحوظة مهمة جدا : احنا لاننا عارفين ان التيار هيكون اقل من كذا .. وممكن نجرب من القيم الأعلى للأسفل لحد ما نقرأ قيمة التيار



مستحيل يحصل تعارض بين العلم والدين

لو حصل تعارض بين العلم و آية او حديث صحيح اعرف فوراً انك اما فاهم النص الشرعي غلط او ان النظرية المتعارضة مع النص الشرعي هي التي غلط .. مفيش خيار ثالث ..

وبشوف ان من الغباء الاستدلال على صحة القرآن بالاكتشافات العلمية؛ وكأننا منتظرين البشر يثبتوننا ان الله - سبحانه - مبيكذبش علينا !!

الكلام في الاعجاز العلمي ممكن يكون على سبيل تسلية النفس .. لكن خطأ كبير جداً اننا نعتبره عامود من أعمدة العقيدة!!

كثير من النظريات اتغيرت .. والحقائق المثبتة اتبدلت .. تفكر لو بنيت ايمانك على نظرية وانهارت .. موقفك هيكون ايه؟! !!



الفصل الرابع

الدائرة الكهربائية وأهم العناصر



الفصل الرابع : الدائرة الكهربائية واهم العناصر

فى الفصل دا هنبدا فى التعامل مع العناصر الالكترونية و نفهم وظيفتها و طريقة استخدامها و هنجمعهم مع بعض فى صورة دوائر الكترونية بسيطة؛ بعد كدا هنتدرج فى الفصول الجاية ونعمل دوائر اكثر تعقيد باستخدام عناصر مختلفة .. يلا نبدا ..

ايه هي الدائرة الكهربائية ؟


الدائرة الكهربائية هي مجموعة من العناصر متوصلة مع بعض علشان تقوم بوظيفة محددة؛ بتختلف كل دايرة عن الثانية من حيث المكونات والوظيفة؛ يعني ممكن تلاقى دايرة كهربية مهمتها انها تشغل اضاءة الشارع بالليل وتطفيها بالنهار بشكل اوتوماتيكي .. وممكن تلاقى دايرة ثانية بتشغل مصباح كهربى لما تصقف لها وتطفيه لما تصقف تاني .. دايرة تالته بتشغلك سارينة انذار لما حد يقطع شعاع ليزر وتديك انذار ان فيه حرامي بيسرقك .. وهكذا ..

اي دايرة كهربية بتتكون من عناصر رئيسية مع مكونات ثانية .. مينفعش
اي دايرة كهربية تخلو منها زى :

- ١- مصدر الطاقة (بطارية - فيشة - خلية شمسية .. إلخ).
- ٢- أسلاك توصيل.
- ٣- عناصر تحكم وحماية (مفتاح - فيوز .. إلخ).
- ٤- أحمال (لمبة - موتور - سخان - كمبيوتر .. إلخ).



تجربة (٤-١)



هات لمبة صغيرة وبطارية و مفتاح كهربى واسلاك .. وصلهم بالشكل اللى فى الصورة دا .. كدا انت عملت دايرة كهربية !!

هتلاحظ ان العناصر الاربعة متوفرة .. مصدر الطاقة (البطارية) .. الأسلاك .. عنصر التحكم (المفتاح) .. الاحمال (اللمبة) ..

المقاومة

نقدر نقسم كل المواد الموجودة على سطح الارض ل ٣ انواع :

- ١- مواد موصلة للكهرباء.
- ٢- مواد عازلة للكهرباء.
- ٣- مواد شبه موصلة للكهرباء.

المواد الموصلة بتختلف عن المواد غير الموصلة فى انها بتحتوى على الكترونات حرة فى ذراتها بتقدر تتنقل من ذرة للتانية وبالتالي تنقل التيار الكهربى .



وبتختلف المواد الموصلة فيما بينها فى قدرتها على توصيل التيار الكهربى .. فمثلا النحاس يوصل التيار الكهربى افضل من الحديد .. والحديد يوصل التيار الكهربى افضل من الماء الذى فيه املاح (الماء النقى عازل للكهرباء) .. قدرة كل مادة على توصيل التيار الكهربى هى خاصية كهربية بنسبها (التوصيلية) .

من هنا قدرنا نضع عناصر كهربية جديدة اسمها (المقاومات) .. ودى بتكون عبارة عن مادة توصيلتها الكهربائية ضعيفة بنحطها فى الدائرة الكهربائية علشان تسمح بمرور كمية اقل من التيار الكهربى .. زى حنفية المية الذى بتسمح بمرور جزء بسيط من المية الذى جاىة فى المواسير .

المقاومات فيه منها انواع كثير لكن خلىنا نقسمها لقسمين :-

١- مقاومات ثابتة.

٢- مقاومات متغيرة.

المقاومات الثابتة


قيمتها ثابتة دائما ومينفعش تغيرها .. فيه منها اشكال وانواع كثير اشهرها المقاومة الكربونية والسلكية .



المقاومة السلكية :

لو قمنا بضخ مية فى ماسورتين واحدة كبيرة والتانية صغيرة .. تفتكر المية هتمشى في مين فيهم اسهل وبكمية اكبر ؟ اكيد الماسورة الكبيرة ..

دا مبدأ عمل المقاومة السلكية .. جنبنا سلك رفيع اوى لفينا على قلب من السيراميك العازل للكهرباء عدد لفات كبير علشان كل ما طول السلك زاد كل ما مقاومته زادت .. بالتالى لما تحط المقاومة دى فى الدائرة السلك بيخفف التيار الكهربى لانه رفيع جدا وببسمح بمرور جزء بسيط منه.




المقاومة الكربونية :

مشكلة المقاومة السلكية اننا مبنقدرش نعمل بيها مقاومة بقيمة كبيرة؛ لاننا هحتاج سلك رفيع جدا وطويل جدا وبالتالي حجمها وتكلفة تصنيعها هتكون عالية. علشان كذا عملنا نوع تاني من المقاومات اسمه مقاومة كربونية. المقاومة الكربونية بتكون عبارة عن خليط من مادة الكربون (الموصلة) وبودرة السيراميك (العازلة) بيتخلطوا مع بعض



بنسب معينة بتختلف بحسب قيمة المقاومة اللي عايزين نصلعها. ممكن نوصل فى النوع دا من المقاومات لقيمة ٢٠ مليون اوم (٢٠ ميغا اوم) .



المقاومات المتغيرة

ودى مقاومات بنقدر نتحكم فى قيمتها بشكل يدوي او بتغير قيمتها بنفسها بناء على تغير كمية فيزيائية تانية. زي المقاومة الحرارية اللي بتتغير بالحرارة والضوئية اللي بتتغير بالضوء.

المقاومة المتغيرة اليدوية



ودى واحدة من اهم انواع المقاومات ومن اكثرها شيوعا. يعني مثلا هتلاقيها موجودة فى مفتاح التحكم فى الصوت فى الراديو ومفتاح التحكم فى درجة حرارة السخان الكهربى وغيرها من الاجهزة.

بتكون عبارة عن شريط مقاومة طويل (باللون الاحمر فى الرسمة) وذراع ييلمسه من جوه ونقدر نلفه مع او عكس اتجاه عقارب الساعة؛ وبالتالي بنقدر نكبر او نصغر المسافة بين الطرفين (ب) والطرفين (أ) و (ج)؛ وزى ما قولنا فى المقاومة السلكية ان طول السلك كل ما يزيد المقاومة بتزيد؛ وكل ما بيقل المقاومة بتقل .. ودى فكرة المقاومة المتغيرة.



تجربة (٤-٢)

اصنع بنفسك مقاومة متغيرة


هات دبابيس وقلم رصاص و ورق مقوى او ظرف وافوميتر .. اعمل مستطيل طويل بالقلم الرصاص وظله؛ القلم الرصاص جواه عامود من الكربون اللى بنكتب بيه على الورق ودا موصل للكهرباء.



ثبت دبوس فى بداية المستطيل .. وغير مكان الدبوس الثاني وقيس المقاومة بينهم هتكتشف انه بتتغير نتيجة تغير طول المقاومة (الكربون).



المقاومة الضوئية




عمرك سألت نفسك ازاى اعمدة الانارة فى الشارع بتنور لوحدها بالليل و
تطفى لوحدها بالنهار ؟

الاجابة : ان فيه دايرة كهربية فى كل عامود فيها عنصر الكتروني
حساس للضوء وهو المقاومة الضوئية .. قيمة المقاومة الضوئية بتكون
عالية جدا لو مفيش ضوء ساقط عليها وبمجرد ما تسقط عليها ضوء
قيمتها بتنخفض جدا جدا.

ملحوظة : كثير من اعمدة الانارة بتشتغل بالنهار وبالليل ودا مش
بيكون عيب فى الدايرة الكهربائية؛ كل الحكاية ان فيه تراب كثير
اتجمع فوق المقاومة الضوئية فمبقاش يسمح للضوء انه يوصل
لسطح المقاومة وبالتالي المقاومة طول الوقت حاسة ان
الدنيا ليل !!



المقاومة الحرارية (الثيرمستور)



النوع دا من المقاومات بيتغير بتغير درجة الحرارة و دا نفسه اللي موجود فى الموبايل اللي بيخليه يفصل لو درجة حرارته ارتفعت؛ وموجود فى الثيرموتيتير الديجيتال اللي بنقيس بيه درجة حرارتنا؛ وبيحس بدرجة حرارة موتور العربية و درجة حرارة السخان ودرجة حرارة الاوضة لما تشغل التكييف .. إلخ.

ممكن كمان تعمل دايرة حماية بسيطة باستخدام المقاومة الحرارية ودا اللي هنتعلمه فى الفصول اللي بعد كدا؛ مثلا ممكن تعمل دايرة كهربية لو حسنت ان درجة حرارة الغرفة زادت عن ٥٠ درجة تعمل انذار ان فيه حريق!!



ازاي نعرف قيمة المقاومة

المقاومات الثابتة او المتغيرة التقليدية اما بيكون مكتوب عليها قيمتها بشكل مباشر او بنقدر نعرفها من خلال كود الالوان بالنسبة للمقاومات السلكية والكربونية.

لكن قبل ما نتعلم ازاي نعرف قيمة المقاومة من خلال الالوان اللي عليها محتاجين نعرف معني بعض المصطلحات اللي بنستخدمها في القيم زي الكيلو والميجا وغيرها.. تابع الجدول التالي وهنطبق كلامنا علي المتر كوحدة قياس المسافة بما انه اكثر حاجة معروفة للجميع ..

المصطلح	القيمة	الرمز	التطبيق على المتر
نانو	جزء من مليار	n	1 نانو متر = 0.000,000,001 متر
مايكرو	جزء من مليون	μ	1 مايكرو متر = 0.000,001 متر
مللي	جزء من ألف	m	1 مللي متر (مم) = 0.001 متر
كيلو	مضروب \times ألف	K	1 كيلو متر (كم) = 1000 متر
ميجا	مضروب \times مليون	M	1 ميجا متر = 1,000,000 متر
جيجا	مضروب \times مليار	G	1 جيجا متر = 1,000,000,000 متر




نشوف بقى كود الالوان وازاى بنقدر نعرف منه قيمة المقاومة
المقاومات الكربونية بيكون عليها مجموعة من الالوان بنقدر نعرف منهم
قيمتها زى اللى فى الصورة.



خطوات معرفة قيمة المقاومة من خلال كود الالوان:-

- ١- امسك المقاومة بالوضع اللى فى الصورة اللى تحت بحيث الأربع
ألوان اللى جنب بعض يكونوا شمال واللون الفضى او الذهبى
يكون يمين.
- ٢- اللون الفضى معناه ان سماحية المقاومة ١٠٪ يعنى لو هي ١٠ اوم
فهى ممكن تكون فيها خطأ وقيمتها الحقيقية بين ٩ اوم و ١١
اوم.
- ٣- اللون الذهبى معناه ان سماحية المقاومة ٥٪ يعنى لو هي ١٠ اوم
فهى ممكن يكون فيها خطأ وقيمتها الحقيقية بين ٩.٥ اوم و
١٠.٥ اوم.
- ٤- قيمة المقاومة بتتحدد بأول ألوان لو كان عددها ٣ او ٤ .
- ٥- اول لونين (فى حال ان عدد الالوان ٣) او ثلاثة (فى حال ان عدد
الالوان ٤) بنحط قيمتهم جنب بعض والرقم اللى هيطلعنا نضربه
فى قيمة اللون الاخير (معامل الضرب) .






اللون	الحلقة الاولى	الحلقة الثانية	الحلقة الثالثة (موجودة)	معامل ضرب
أسود	٠	٠	٠	Ω
بنّي	١	١	١	$\Omega \cdot 10$
أحمر	٢	٢	٢	$\Omega \cdot 100$
برتقالي	٣	٣	٣	$1K\Omega$
أصفر	٤	٤	٤	$10K\Omega$
أخضر	٥	٥	٥	$100K\Omega$
أزرق	٦	٦	٦	$1M\Omega$
بنفسجي	٧	٧	٧	$10M\Omega$
رمادي	٨	٨	٨	$100M\Omega$
أبيض	٩	٩	٩	$1G\Omega$



مثال :-

اقرأ قيمة المقاومة دي




الحلقة الاولى	الحلقة الثانية	الحلقة الثالثة	الحلقة الرابعة
أخضر	ازرق	برتقالي	ذهبي
٥	٦	10KΩ	سماحية ٥%

$$560 \text{ K}\Omega = ٥٦ \times ١٠ \text{ K}\Omega = \text{الاجابة}$$



مثال :-

اقرأ قيمة المقاومة دي



الحلقة الخامسة	الحلقة الرابعة	الحلقة الثالثة	الحلقة الثانية	الحلقة الاولى
بني	برتقالي	اسود	اسود	بني
سماحية ١٪	10KΩ	.	.	١

$$1 \text{ M}\Omega = 100 \times 10 \text{ K}\Omega = \text{الاجابة}$$

طرق توصيل المقاومات فى الدائرة


يمكن نوصل المقاومات فى الدائرة بنوصلها بطريقتين :

- توصيل توالي.
- توصيل توازي.



توصيل المقاومات على التوالي

بنقول ان المقاومات متوصلة على التوالي لو كل مقاومة متوصلة بعد الثانية زي الصورة . وبتكون القيمة الاجمالية للمقاومات عبارة عن حاصل جمعهم؛ ودا معناه انك تقدر تحصل على مقاومة ٢٠ كيلو اون مثلا بتوصيل مقاومتين ١٠ اوم على التوالي.



وفى الحالة دى المقاومة الاجمالية بيتم حسابها من خلال القانون التالي

$$R = R1+R2+R3$$



مثال :

احسب قيمة المقاومة الكلية للدائرة السابقة


الإجابة

$$R = R_1 + R_2 + R_3$$

$$R = 10 + 53 + 100 = 163 \Omega$$

توصيل المقاومات على التوازي

بنقول ان المقاومات متوصلة على التوازي لو كان طرفين كل مقاومة متصل بطرفين المقاومات الثانية زي ما فى الصورة.



وفى الحالة دى المقاومة الاجمالية بيتم حسابها من خلال القانون التالي

$$\frac{1}{R_t} = \frac{1}{R_1} + \frac{1}{R_2} + \frac{1}{R_3} + \dots$$



المكثفات

المكثف عبارة عن عنصر إلكتروني مهمته تخزين الطاقة الكهربائية وتفريغها في الوقت المناسب؛ لكن مقدار تخزينه للطاقة محدود جداً بالإضافة إلى أنه يتم شحنه وتفريغه في وقت صغير جداً بعكس البطاريات .

المكثف يتكون من شريحتين من مادة موصلة بينهما شريحة من مادة عازلة .. ممكن تكون ورق أو سيراميك أو حتى هواء .. وغيرها من المواد .. وبنقدر نقيس سعة المكثف عن طريق وحدة الفاراد (على اسم العالم اللي اخترع المكثف فارادي) .

أنواع المكثفات

المكثفات زي المقاومات منها مكثفات ثابتة ومكثفات متغيرة .

المكثفات المتغيرة :

ودي بنقدر نغير سعة تخزينها وفق الحاجة بشكل يدوي؛ بتكون شبيهة بالمقاومة المتغيرة لحد كبير. وهي نفسها اللي موجودة في الراديو بتاع زمان .. البكرة اللي كنا بنلفها علشان نغير المحطة .. لان المكثف جزء أساسي من دائرة الرنين المسئولة عن تحديد تردد القناة اللي هيستقبلها الراديو.



المكثفات الثابتة:

وادي قيمتها مبننتغيرش ومنها انواع كثير بتختلف باختلاف المادة العازلة اللى بين الشريحتين الموصلتين ومنها :

- ١- المكثفات الورقية : وفى النوع دا بتكون المادة العازلة عبارة عن ورق بمواصفات معينة.
- ٢- المكثفات السيراميكية : وهنا بتكون المادة العازلة عبارة عن مادة سيراميكية (خزفية).
- ٣- المكثفات الكيميائية : ودي مختلفة عن كل انواع المكثفات التانية فى ان اطرافها ليها قطبية .. رجل موجبة ورجل سالبة .. ولو تم توصيل المكثف الكيميائى بشكل خاطئ ممكن ينفجر !



المكثف الورقي



المكثف المتغير



المكثف الكيميائى



المكثف السيراميكي



قراءة قيم المكثفات




المكثف الكيميائي

يكون مكتوب عليه ٤ معلومات:

- **سعة المكثف** : مكتوب ١٠٠٠٠ µF
- **اقصى جهد تشغيل** : ٢٥ فولت
- **اقصى درجة حرارة مسموح بها** : ١٠٥ مئوية
- **الطرف السالب** : يشار عليه الشريط الرمادي اللى مكتوب فيه .
وكمان يكون الطرف الاقصر.

المكثف السيراميكي

يكون مكتوب عليه رقمين او ثلاث .. لو رقمين فبيكون دا قيمته المباشرة بوحدة البيكو فاراد (البيكو جزء من الالف من المايكرو) . ولو ٣ ارقام فالرقم الثالث بيكون عدد الازهار اللى بتزودها لأول رقمين.



تجربة (٤-٣)

اصنع مكثف بنفسك



هات ازالة مية فاضية املاها مية مدوب فيها ٣ معالق ملح كبيرة وكيسين بيكنج باودر او تضيف نص الازازة خل .. غلفها بورق فويل من برا و غطي الفويل بشريط لزق عازل (شيكارتون).

اخرم الغطا و حط فيه مسمار طول يوصل للمية .. وصل سلك بالمسمار و سلك بورقة الفويل .. كدا بقى عندك مكثف .. هات بطارية وصلها بالطرفين وافصلها .. قرب الطرفين ببعض هيحصل تفريغ كهربى وتتولد شرارة شبه البرق وممكن تقيس سعة المكثف بالافوميتر.





الموحد (الدايود)

لما اتكلما عن توصيلية المواد للتيار الكهربى قولنا ان فيه مواد موصلة ومواد عازلة و مواد شبه موصلة؛ المواد شبه الموصلة بيتم تصنيع عناصر الكترونية خاصة منها زى الموحد و الترانزستور و الاى سيهات و البروسييسور بتاع الكمبيوتر والموبايل.

فكرة الداىود انه بيكون عنصر الكترونى بيسمح بمرور التيار فيه لو متوصل بشكل صحى وبيمنع مرور التيار الكهربى لو متوصل بشكل عكسى؛ بيكون له طرفين طرف بنسميه (أنود) وطرف اسمه (كاثود) .. علشان الداىود يمرر تيار كهربى محتاجين نوصل الأنود بالقطب الموجب والكاثود بالقطب السالب للدائرة.

بنقدر نفرق بين الطرف الأنود والطرف الكاثود فى الموحد عن طريق الخط الفضى المرسوم عليه؛ ودا عادة بيكون ناحية الطرف الكاثود.




الموحد فيه منه انواع كتير اشهرها الموحدات الضوئية ودي اللى هنتعرف عليها فى الفقرة الجاية.



الموحد الضوئي (الليد)

ودا نوع من انواع الموحدات بيوصل التيار الكهربى لو متوصل بشكل
مضبوط ويمنع التيار من المرور لو



متوصل بشكل عكسى؛ لكن
يمييزه انه لما بيتوصل بشكل
مضبوط بينور .. ويكون شبه
اللمبة الصغيرة ..

كمان بيتميز ان شدة اضاءته

مرتفعة جدا لدرجة ان شدة اضاءة ليد صغير بتكون اعلى من شدة اضاءة ٦
شمعات مشتعلة !! ودا السبب اللى بيخلينا نستخدمه فى لمبات الليد اللى
بتتكون من مجموعة من الليدات الصغيرة دى وبتكون شدة اضاءتها عالية
واستهلاكها للطاقة صغير جدا جدا .




بنقدر نعرف الطرف الانود فى الليد
من خلال طوله .. بيكون أطول من
الطرف الكاثود .. ولو كان الليد
بتاعك شفاك وتقدر تشوف التكوين
الداخلى هتلاقى ان الطرف الانود
هو الطرف الرفيع والطرف الكاثود
هو الطرف العريض.

الليد فيه اشكال كثير جدا وألوان



كثير .. ابيض واصفر واحمر و ازرق واخضر .. وفيه نوع بتقدر تحصل منه على اى لون بالتحكم فى شدة الالوان الرئيسية (الاحمر - الاخضر - الازرق) ودا اللى بتتعمل منه شاشات العرض الكبيرة.

الترانزستور



الترانزستور عنصر الكتروني مصنوع من المواد شبه الموصلة ويعتبر ٢ موحد موصلين ببعض بطريقة عكسية؛ بنقدر نستخدم الترانزستور فى حاجات كثير اهمها انه مفتاح الكتروني ومكبر اشارة .

ممكن نقول ان الترانزستور شبه الموحد العادى .. مبيسمحش بمرور التيار الا فى اتجاه واحد؛ لكن بيكون له طرف اضايفى اسمه (القاعدة) شرط اساسي علشان الترانزستور يمرر تيار كهربى اننا نوصل جهد كهربى عليها.



اطراف الترانزستور ٣ :-



1. المشع
2. القاعدة
3. المجمع

- ١- المجمع
- ٢- القاعدة
- ٣- الباعث

لما بنوصل جهد كهربى للقاعدة و نوصل المجمع بالقطب الموجب والباعث بالقطب السالب بيشتغل الترانزستور ويسمح بمرور التيار بين المجمع والباعث.

ملحوظة : الترانزستور هو العنصر الاساسى فى كل الاجهزة الحديثة واللى مقدرناش نضع الكمبيوتر قبل اختراعه؛ كل الكمبيوترات والموبايلات و التلفزيونات والراديو وحتى الآلات الحاسبة فى العالم بتعتمد على الترانزستور بشكل اساسى.



المحول (الترانس - الترانسفورمر)




لما اتكلمنا عن المغناطيسية اتعلمنا نعمل مغناطيس و اتعلمنا نولد تيار كهربى بواسطة المغناطيس. هى دى بالضبط فكرة المحول .. بيبكون عندنا ملفين من الاسلاك الملف الاول بنوصله بالتيار الكهربى فيعمل مجال كهرومغناطيسى حواليه؛ والملف الثانى لما بيقطع المجال الكهرومغناطيسى للملف الاول بيدوله لتيار كهربى.



المحولات عناصر اساسية فى شبكات نقل الكهرباء والاجهزة الالكترونية البسيطة والمعقدة؛ يعني مثلا شاحن موبايلك عبارة عن محول صغير وبعده دائرة الكترونية بسيطة؛ كمان لما اتكلمنا فى اول فصل عن توليد ونقل الكهرباء عرفنا ان المحولات اساسية لنقل الكهرباء من محطات التوليد للبيت.

تركيب المحول



- ١- **ملف ابتدائى** : ملف بعدد لفات معين من الاسلاك ويكون متصل مباشرة بمصدر التيار الكهربى المغذى للدائرة.
- ٢- **ملف ثانوي** : ملف بعدد لفات معين من الاسلاك ويكون متصل بالحمل.
- ٣- **قلب** : الجزء اللى بيتلف عليه الملفين ودا ممكن يكون مصنوع من الحديد او السيراميك او غيرها من المواد.



٤- **عوازل** : مواد عازلة بتغطي الاسلاك لحماية المستخدم من صدمة التيار الكهربائي و كمان بتمنع الملفات انها تلمس بعضها.

فيه انواع كثير من المحولات لكن اهمها :

- ١- **محولات رافعة** : ودي بترفع الجهد وتخفيض التيار.
- ٢- **محولات خافضة** : ودي بتخفيض الجهد و ترفع التيار.

علشان نقدر نحدد نوع المحول بنستخدم القانون دا

$$\frac{\text{عدد لفات الملف الثانوي}}{\text{عدد لفات الملف الابتدائي}} = \frac{\text{جهد الخرج}}{\text{جهد الدخل}} = \frac{\text{تيار الدخل}}{\text{تيار الخرج}}$$

مثال :-

محول كهربائي عدد لفات الملف الابتدائي ١٠٠ لفة وعدد لفات الملف الثانوي ١٠ لفات يتم تغذيته بتيار ١٠ امبير بجهد ٢٢٠ فولت؛ احسب جهد الخرج واقصى تيار للخرج وحدد نوعه (خافض ولا رافع)..



الحل

$$\frac{\text{عدد لفات الملف الثانوي}}{\text{عدد لفات الملف الابتدائي}} = \frac{\text{جهد الخرج}}{\text{جهد الدخل}} = \frac{\text{تيار الدخل}}{\text{تيار الخرج}}$$

$$\frac{10}{\text{تيار الخرج}} = \frac{\text{جهد الخرج}}{220} = \frac{10}{100}$$

جهد الخرج = ٢٢ فولت

تيار الخرج = ١٠٠ امبير

نوع المحول : محول خافض (لانه خفض جهد الدخل من
٢٢٠ ل ٢٢ فولت)



الدين له هدفين أساسيين

- ١- تحقيق التوحيد الخالص لله سبحانه وتعالى..
- ٢- اصلاح شؤون العباد وخلاف الله فى أرضه..

فى المجمال الدين عايزك تبقى انسان متكامل .. انسان مميز .. انسان تقدر تصنع فرق و تحقق نجاحات لنفسك و عيلتك و بلدك ودينك ..

فاللى بيعتبروا الدين مجرد صلاة و صيام و زكاة و صدقة و اخلاق .. هم مجرد دراويش..

واللى بيعتبروا الدين انك تجتهد فى شغلك و تزود علمك و تتابع الجديد من غير الشعائر .. هم مجرد ماديين مفرطين.

مطلوب منك انك تجتهد فى الشعائر وفى نفس الوقت تشتغل على نفسك فى العلوم الدنيوية و تتقن عملك و تطور من نفسك.



الفصل الخامس

خطواتك الاولى فى الدوائر الالكترونية




الفصل الخامس : البداية مع الدوائر الالكترونية

فى الفصل دا هنتعلم نعمل بنفسنا دوائر الكترونية مختلفة متدرجة فى التعقيد بحيث فى نهاية الفصل نبقى قادرين اننا نعمل اى دائرة الكترونية مهما كان تعقيدها.

عايزك تظمن .. كل الدوائر الالكترونية الموجودة فى الفصل دا آمنة تماما.

اول حاجة محتاجين نتعلمها فى رحلتنا لتنفيذ الدوائر الالكترونية هى اننا نفهم لوحة التجارب (البريد بورد) وازاى نقدر نستخدمها لبناء اى دائرة.





لوحة التجارب (البريد بورد)

لوحة التجارب عبارة عن لوحة مصنوعة خصيصا علشان تساعدك فى تنفيذ الدوائر الالكترونية بدون ما تحتاج تلحم مكوناته وتتعب فى تصنيعها؛ وكمان لو عملت خطأ فى الدائرة هيكون سهل عليك جدا انك تصلحه .. طب بتشتغل ازاي؟! تعالى نشوف مع بعض ..




لوحة التجارب تتكون من ثقوب كثير جدا بنوصل بيها اطراف المكونات الالكترونية (مقاومة .. مكثف .. ليد .. إلخ) .. الثقوب دى من جوة بتبقى عبارة عن مجموعات متصلة ببعضها زى ما واضح فى الصورة .. كل خط بيوضح النقط الللى متصلة ببعضها ..

يعني مثلا اول خط فوق خالص (باللون الاحمر) هتلاقيه متصل من يمين اللوحة لشمالها .. ومكتوب جنبه (+) وتحتة خط (أزرق) تاني بيمر بصف الثقوب الللى تحتة ومكتوب جنبه (-) .. دا معناه اننا لو وصلنا طرفين البطارية .. القطب الموجب بثقب من الخط الللى فوق خالص .. هتبقى كل الثقوب الللى على الخط دا واصله بالقطب الموجب ونقدر نوصل بيها مكونات تانية .. ولو وصلنا القطب السالب من البطارية بثقب من الخط التاني هتبقى كل النقط الللى على الخط التاني متصلة بالقطب السالب بالبطارية.




تجربة (١-٥)



نفذ الدائرة دي على لوحة التجارب

اتعرفنا قبل كذا على رموز العناصر دي .. الرمز دا معناه مفتاح ..
والرمز دا معناه بطارية و الرمز الاخير هو رمز اللمبة ..




شكل الدائرة لو وصلناها بشكل مباشر
هيكون كذا




يلا نوصلها بلوحة التجارب


الخطوة الاولى : هنوصل البطارية بأطراف التغذية



الخطوة الثانية : هنوصل المفتاح بالشكل اللي فى الصورة و نوصل احد اطرافه بخط التغذية الموجب.




توصيل طرف بخط التغذية




تركيب المفتاح






الخطوة الثالثة : هنوصل طرفين اللمبة .. واحد بالطرف الثاني للمفتاح .. و واحد بالطرف الثاني لخطوط التغذية (السالب).

الخطوة الرابعة : هندوس على المفتاح .. هتلاحظ ان اللمبة هتشتغل!!



وبكدا نكون عملنا اول دايرة لينا باستخدام لوحة التجارب .. تعالى نجرب مع بعض نعمل دايرة اعقد شوية ..




تجربة (٥-٢)

يلا ننفذ الدايرة دي

المكونات المطلوبة

م	البند	العدد
١	ليد	١
٢	بطارية ٩ فولت	١
٣	مقاومة ٥٠٠ اوم	١
٤	أسلاك توصيل	١
٥	لوحة تجارب	١

التوصيلة هتكون بالشكل دا




ملحوظة : متنساش ان الليد علشان ينور لازم يكون متوصل بشكل مطبوط .. الانود بيكون واصل بالقطب الموجب والكاثود بالقطب السالب .. بعد ما تشغل الدائرة والليد ينور معاك حاول تقلبه وتشوف النتيجة .. هتلاقيه ميينورش .. ولو سبته شوية على الوضع دا هيتحرق (هيبوظ بدون نار) ..

أسلاك التوصيل

فيه انواع كتير لأسلاك التوصيل .. منها اللي ببيجي فى شكل مجموعة اسلاك طولها مختلف فى علبة بلاستيك .. منها اللي ببيجي فى صور اسلاك منفصلة فى نهايتها دبابيس لسهولة التثبيت فى فتحات لوحة الاختبار ومنها اللي بنعمله بشكل يدوي بإننا بنقصه من اى سلك رفيع بالطول اللي احنا عايزينه ونستخدمه مباشرة.. وفى الحالة دى انصحك انك تستخدم أسلاك كابل الشبكة المنزلية (**سلك النت**) او اللي بنسميه CAT5

..



CAT5

جامبر توصيل

علبة توصيلات جاهزة



دائرة التحكم فى الاضاءة اوتوماتيكيا

الدائرة دى فيها ليد بيتم التحكم فى اضاءته بشكل اوتوماتيكي من خلال المقاومة الضوئية LDR اللى بتحس بالضوء وبتتغير قيمتها بتغيير شدة الضوء الواقع عليها .. هى نفسها فكرة الدائرة اللى بتتركب فى اعمدة الانارة فى الشوارع وبتخلى اضاءة الشوارع تشتغل بالليل وتطفى بالنهار لوحدها.

الادوات المطلوبة

م	البند	العدد
١	مقاومة ٤٧٠ اوم	١
٢	مقاومة متغيرة ١٠٠ كيلو اوم	١
٣	مقاومة ضوئية	1
٤	ترانزستو BC577	1
٥	ليد	1
٦	بطارية	١
٧	لوحة تجارب	١
٨	أسلاك توصيل	١




دائرة ضوء سيارة الشرطة

الدائرة دي فيها ٢ ليد بينوروا بالتناوب فيما بينهم زي سارينة عربية الشرطة والاسعاف بالظبط .

الادوات المطلوبة

العدد	م	البند
٢	١	مقاومة ٢٢ كيلو اوم
٢	٢	مقاومة ٤٧٠ اوم
٢	٣	مكثف كيميائي ١٠٠ مايكرو فاراد
٢	٤	ترانزستو PN2222
٢	٥	ليد
١	٦	بطارية
١	٧	لوحة تجارب
١	٨	أسلاك توصيل




بالنسبة للترانزستور فقولنا قبل كذا انه له ٣ اطراف .. مجمع وقاعدة ومشع .. علشان تعرف ترتيب اطراف اى ترانزستور ما عليك الا انك تكتب اسمه فى جوجل وتبص على الصور .. ودى صورة بتوضح اطراف الترانزستور الللى هنستخدمه فى الدائرة دى .



PN2222


1. المشع
2. القاعدة
3. المجمع

مخطط الدائرة



قبل التوصيل محتاج افكر اننا عندنا عناصر مش مهم ترتيب اطرافها زي المقاومة .. وعناصر لازم نوصلها بشكل صحيح ومنبدلش موضع اطرافها زي الليد والبطارية والترانزستور .. والمكثف الكيمائي .

نبدأ توصيل الدائرة على لوحة التجارب



فى الاسلام مفيش رجل دين و رجل عادى ..

كلنا امام الله سواسية .. لينا نفس الحقوق وعلينا نفس الواجبات ..

كلنا على مسافة متساوية من الله .. واحنا بأعمالنا اللى بنقرب او نبعد المسافة دى.

فى الاسلام مفيش وسيط بينك وبين ربنا .. عايز حاجة من ربنا ادعيه على طول .. عايز تتقرب من ربنا صلى وصوم واجتهد فى حياتك العملية وقوم بمسئولياتك تجاه نفسك و اسرتك و بلدك ودينك ..

ومتناساش .. أقرب ما يكون العبد الى ربه وهو ساجد ..









الفصل السادس

رموز العناصر





الإلكترونية






الفصل السادس : رموز العناصر الالكترونية

عناصر القدرة والتوصيل	
	١ نقطة توصيل
	٢ كوبرى غير متصل
	٣ أرضي (٠ فولت)
	٤ أرضي منخفض الضوضاء
	٥ أرضي شاسيه
	٦ بطارية خلية واحدة






	بطارية متعددة الخلايا	٧
	مصدر جهد	٨
	مصدر جهد يتم التحكم به	٩
	مصدر تيار	١٠
	مصدر تيار يتم التحكم به	١١
	مصدر جهد متردد	١٢




المقاومات		
	مقاومة ثابتة ١	١
	مقاومة ثابتة ٢	٢
	مقاومة متغيرة ١	٣
	مقاومة متغيرة ٢	٤
	مقاومة متغيرة ٣ اطراف ١	٥
	مقاومة متغيرة ٣ اطراف ٢	٦
	مقاومة حرارية	٧



	مقاومة ضوئية	٨
---	--------------	---

المكثفات والملفات		
	مكثف عام	١
	مكثف كيميائي (قطبي) ١	٢
	مكثف كيميائي (قطبي) ٢	
	مكثف متغير	٣




	مكثف متغير ٢	٤
	ملف قلب هوائي	٥
	ملف قلب مغناطيسي	٦
	ملف ذو عدة اطراف	٧





الموحدات		
	موحد عام	١
	موحد زينر	٢
	موحد نفقي	٣
	موحد سكوتي	٤
	موحد باعث للضوء (ليد)	٥
	موحد ضوئي	٦
	مكثف متبدل	٧




	<p>موحد شوكلي</p>	<p>٨</p>
	<p>موحد سيلكون يتم التحكم به</p>	<p>٩</p>
	<p>موحد مثبت للتيار</p>	<p>١٠</p>





الهوائيات		
	<p>هوائى عام</p>	<p>١</p>
	<p>هوائى ثنائى القطب</p>	<p>٢</p>







	هوائي ملف	٣
	هوائي ملف ٢	٤

المفاتيح		
	مفتاح عام	١
	مفتاح قلاب	٢
	مفتاح قلاب بطرفين	٣







		
	٤ مفتاح سوستة (وضع مفتوح)	
	٥ مفتاح سوستة (وضع مقفول)	
	٦ مفتاح سوستة قلاب	
	7 ريلاي	




الترانزستورات		
	ترانزستور NPN	١
	ترانزستور PNP	٢
	ترانزستور دارلنجتون NPN المزدوج	٣
	ترانزستور دارلنجتون PNP المزدوج	٤



	جي فيت N	٥
	جي فيت P	٦
	موسفت عام	٧
	موسفت محسن نوع N	٨





	<p>موسفت محسن نوع P</p>	<p>٩</p>
---	-------------------------	----------


اللمبات		
	<p>لمبة بيان ١</p>	<p>١</p>
	<p>لمبة بيان ٢</p>	<p>٢</p>
	<p>لمبة بيان ٣</p>	<p>٣</p>
	<p>لمبة اضاءة</p>	<p>٤</p>



	لمبة نيون	٥
---	-----------	---

المحولات		
	محول عام	١
	محول بنقطة منتصف	٢
	محول بملفين ثانويين	٣
	محول تيار	٤



	محول جهد	٥
	محول تيار شبك	٦
	محول تيار دفع	٧



الصلاة هي اهم شعائر الدين على الاطلاق ..

المميز فيها انها عاملة زى الحبل المطاط اللى رابطك بالدين .. كل ما تبعد .. الصلاة بتشدك تاني .. علشان كدا بنقول عليها حصن المؤمن .. نقطة دفاع وجدار حماية ..

الصلاة كمان فيها ميزة استثنائية جدا .. انها أداة لجمع الكلمة ونبذ الفراق .. كلنا بنتجمع فى الصلوات .. خصوصا صلاة الجمعة و العيد .. بكل خلافاتنا واختلافاتنا ..

علشان كدا متستغربش لما النبي - صلى الله عليه واله وسلم - يقولنا : ((الصلاة عماد الدين)) ..



الفصل السابع

الحساسات



الفصل السابع : الحساسات

الحساسات هى اى حاجة بتحس باى كمية فيزيائية او بتحس بوجود اى مادة زى الحرارة والرطوبة و المطر و حساسات السرعة و الصوت ... إلخ.

الحساسات الكهربية نوعين :

١- **حساسات ديجيتال (رقمية)** : والنوع دا من الحساسات بيحس بحاجة معينة ويقولك ان كانت موجودة ولا لا .. زى الحساس اللى موجود فى باب التلاجة فى صورة زرار صغير .. بيعرفك ان كان باب التلاجة مفتوح او لا .. وعلى اساسه بيشغل ضوء التلاجة او يطفئه .. ميقولش ان كان الباب مفتوح اوى او مفتوح نص نص .. يا مفتوح يا مقفول .

٢- **حساسات أنالوج (تناظرية)** : والنوع دا بيحس بقيم مختلفة من الحاجة اللى يقيسها .. يعني مثلا حساسات الحرارة .. معظمها بيقولك درجة الحرارة كام .. ممكن ٣٠ ممكن ٤٠ ممكن ٥٠ .. حساسات الرطوبة اللى بتقيس كمية بخار الماء الموجود فى الهواء .. حساسات السرعة الموجودة فى العربية اللى بتقولك هى ماشية بسرعة كام كيلو متر فى الساعة.

فى الفصل دا هنتعرف على بعض العناصر الالكترونية المستخدمة فى دوائر الحساسات و هنتصنع بنفسنا دوائر تحكم وانذار اوتوماتيكية باستخدام حساسات مختلفة او بدون اى عناصر جديدة.



الامثلة اللى هنعملها فى الفصل دا :-

- ١- مقياس مستوى الماء فى خزان.
- ٢- إنذار بارتفاع درجة الحرارة.
- ٣- مقياس شدة الحرارة.
- ٤- حساس اهتزاز.
- ٥- حساس لمس.
- ٦- دائرة كشف الكذب.

مقياس مستوى الماء فى خزان

ال الخزانات اساسية فى كثير من المصانع وحتى فى البيوت خاصة فى المناطق اللى المية بتقطع فيها كثير او فى الصحراء اللى بيحتاجوا يملوا فيها الخزان علشان يستهلكوا المية اللى فيه لفترة طويلة ويعيدوا ملئه مرة ثانية لما يقرب يخلص.

كلمة خزان هى كلمة بتطلق على اى وعاء او هيكل كبير او صغير بنحتفظ جواه بسائل وبنستهلكه بالتدرج .. زى خزان البنزين فى العربية و خزانات المية اللى بتكون فوق اسطح العمارات .

فى التجربة دى هنعمل مقياس عبارة عن ٣ ليدات بيعرفوني المية فى الخزان واصله لفين بالظبط (ربع الخزان - نص الخزان - تلت ارباع الخزان - الخزان ممتلىء بالكامل - الخزان فارغ).



ونقدر نستفيد من الدائرة دي لو حد بيحاول يملأ خزان كبير جدا ومحتاج وقت طويل علشان يملأه على اخره ؛ ومحتاج كل شوية يطلع على السلم علشان يشوف المية بنفسه من فوق وصلت لحد فين .

المطلوب اننا نعمل دائرة .. الدائرة هتوضحلنا الخزان اتملى لحد فين .. ولما يتملى خالص يشغل انذار صوت.

الأدوات المطلوبة :

م	البند	العدد
١	زجاجة مياه	٢
٢	مقاومة 220 اوم	6
٣	Buzzer	1
٤	ترانزستو BC547	4
٥	ليد	٣
٦	بطارية	١
٧	لوحة تجارب	١
٨	أسلاك توصيل	١


عنصر الـ Buzzer (الصفارة)




بيكون عبارة عن صفارة كهربية ليها طرفين بمجرد ما يتوصلوا بالكهرباء بيعملوا صوت عالي جدا بغرض التنبيه؛ هتلاقيه موجود مثلا فى التلاجة لما تفتح بابها لفترة طويلة فيديك انذار .. فيه منه اشكال واحجام كتير بنختلف بحسب التطبيق المستخدم فيه.




مخطط الدائرة




توصيل الدائرة



ملحوظة : لاحظ اني وصلت سلكين احمر واسود فى نص خطين التغذية فوق (الموجب والسالب) .. دا لان لوحات التجارب الكبيرة بتكون مقسومة من النص .. يعني نصها اليمين فى خطوط التغذية مش واصل بنصها الشمال.




عند وصول مستوى الماء الى اسفل الخزان



عند وصول مستوى الماء الى منتصف الخزان





عند اقتراب امتلاء الخزان

إنذار من ارتفاع شدة الحرارة

فى الدائرة دى هنتعرف على عنصر عبقرى اسمه المفتاح الحراري. المفتاح الحراري عبارة عن عنصر الكتروني له طرفين .. يوصلهم او يفصلهم لما بتوصل درجة الحرارة فى محيطه لدرجة حرارة تشغيله.

المفتاح الحراري فيه منه نوعين :-

1- Normally Open او NO

وفى النوع دا الطرفين بيكونوا مفصولين عن بعض ولما توصل درجة الحرارة لدرجة حرارة تشغيل المفتاح بيتوصلوا مع بعض.

2- Normally Closed او NC

ودا عكس النوع الاول؛ فيه الطرفين بيكونوا موصلين ببعض ولما توصل درجة الحرارة لدرجة حرارة التشغيل ينفصلوا عن بعض.



المفتاح دا فيه منه اشكال وقدرات مختلفة ؛ وكمان درجات حرارة مختلفة. فلما نحب نختر واحد بنختره على اساس نوعه وقدرته ودرجة حرارة تشغيله.



يعني مثلا لو محتاجين نعمل دايرة انذار من الحريق فممكن نستخدم مفتاح بيشتغل عند ٥٠ درجة مئوية . ولو محتاجين نعمل دايرة بتكتشف غليان المية هنستخدم مفتاح بيشتغل عند ١٠٠ درجة مئوية.

كل البيانات اللي اتكلمنا عليها هتلاقيها مدونة على المفتاح الحراري؛ لو قرأت اللي مكتوب على الصورة اللي تحت هتكتشف مواصفات المفتاح كالاتي :



درجة حراة التشغيل : ٤٥ مئوية

اقصى جهد بين الطرفين : ٢٥٠ فولت

اقصى تيار بين الطرفين : ٥ امبير

نيجي بقى للدائرة بتاعتنا



مخطط الدائرة



الأدوات المطلوبة

م	البند	العدد
١	مفتاح حراري ٤٠ مئوية - NO	1
٢	بطارية	1
٣	Buzzer	1
٤	أسلاك توصيل	١



توصيل الدائرة




الدائرة فكرتها بسيطة جدا .. لما تكون درجة الحرارة اقل من ٤٠ درجة مئوية المفتاح مبيشتغلش وبيفضل فى وضعه العادى .. طرفيه غير موصلين ببعض . ولما ترتفع درجة الحرارة وتوصل لـ ٤٠ درجة مئوية بيوصل المفتاح لحرارة التشغيل و يقوم بتوصيل اطرافه وبالتالي يسمح للتيار الكهربى انه يمر لـ Buzzer و يقفل الدائرة فتسمع صوت انذار.

مقياس شدة الحرارة

هنستخدم فى الدائرة دى ٤ مفاتيح حرارية بتدرج مختلف لدرجات حرارة التشغيل ؛ ٤٠-٦٠-٨٠-١٠٠ درجة مئوية . هنوصل طرفين كل مفتاح فيهم ببطارية و مقاومة ومنها لليد .. كل ليد فيهم لما يشتغل هنعرف ان درجة الحرارة عدت درجة حرارة التشغيل الخاصة بالمفتاح المتوصل بيه.



مخطط الدائرة



الأدوات المطلوبة

م	البند	العدد
١	ليد	٤
٢	مقاومة ٢٢٠ اوم	٤
٣	بطارية	1
٤	أسلاك توصيل	١
٥	مفتاح حرارى ٤٠ مئوية - NO	١
٦	مفتاح حرارى ٤٠ مئوية - NO	١
٧	مفتاح حرارى ٤٠ مئوية - NO	١
٨	مفتاح حرارى ٤٠ مئوية - NO	١



حساس اهتزاز

حساس الاهتزاز احد اهم الحساسات المستخدمة فى تطبيقات كثير حوالينا؛ اشهرها الحساس اللى بيكون موجود فى العربية بحيث لما حد يحاول يسرقها يحس بيه ويفعل سارينة الانذار.

كمان هتلاقيه موجود فى المتاحف على الصناديق الزجاجية اللى بيحتفظوا فيها بالتماثيل والتحف الفنية؛ بحيث يفعل صوت انذار بمجرد ما حد يحاول لمس المعروضات الفنية لحمايتها من السرقة والاتلاف.

يلا بينا نعمل حساس اهتزاز!!

الادوات المطلوبة

م	البند	العدد
١	سلك نحاس	١
٢	مقاومة ٢٢٠ اوم	١
٣	بطارية	1
٤	أسلاك توصيل	١
٥	ليد	١
٦	مسمار	١
٧	ورقة صنفرة	١
٨	لوحة لتثبيت الاجزاء	١



الخطوات


- ١- هنجيب السلك النحاسي و نصنفره بورقة الصنفرة لإن السلك سيكون عليه طبقة عازلة غير مرئية من الورنيش ومحتاجين نشيلها . ممكن نجيب السلك من ملفات اي موتور قديم عندنا.



- ٢- نلف السلك حوالين المسامير علشان نعمل (سوستة).



٣- تثبيت المقاومة فى اللوحة و حوالها السوستة.



٤- نوصل طرف المقاومة و السوستة بالبطارية والليد.

فى حالة الاهتزاز .. المقاومة هتلمس السوستة وتقفل الدائرة فتتمرر تيار كهربى يشغل الليد ويفعل الانذار.

دائرة كشف الكذب

كلنا عارفين اجهزة كشف الكذب اللى كانت بتيجي فى افلام المخابرات زمان؛ فيها بيلبسوا اللى حابين يكتشفوا صدقه او كذبه جوانتي او اسلاك فى صوابه واحيانا فى جبهته فوق عيونه . دا بالضبط اللى احنا هنعمله دلوقتى بشكل بسيط .

لكن عموما طرق كشف الكذب كثير جدا و اتطورت من بعد الافلام اللى مر عليها اكثر من ٤٠ سنة .. زى كشف الكذب من خلال كاميرات دقيقة جدا



بترصد التغيرات فى تعبيرات وش الانسان لما بيكذب واللى بتحطه بشكل لا ارادى. أجهزة الكمبيوتر اللى متوصله فيها الكاميرات دى كمان بتقدر - باستخدام الذكاء الاصطناعي- تتوقع ايه اللى حاسس بيه الانسان بنفس الطريقة زى انه مثلاً متوتر لان جفون عينه فيها رعشة خفيفة او يحرك رجليه او بيخبط على رجليه بصوابه .. إلخ.


بالنسبة لدايرتنا البسيطة فهي بتعتمد على حقيقة علمية وهي ان لجسم الانسان مقاومة كهربية لأنه موصل جيد للتيار الكهربى؛ المقاومة دى قيمتها بتتغير لما بيكذب الانسان؛ بالاضافة الى ان الكذب وقت الاستجواب ينتج عنه تعرف فى مناطق معينة فى الجسم اشهرها الجبهة؛ والعرق عبارة عن ماء وملح ودا موصل جيد للكهرباء بيتسبب فى ان المقاومة الكهربائية بين اى نقطتين على الجبهة بتقل .

وظيفة جهاز كشف الكذب انه يقيس المقاومة دى ويظهرها بدقة شديدة على شاشة معينة بيحدد اداها الخبير ويتابع قراءات المقاومة ومنها يعرف ان كان الشخص اللى على الجهاز صادق ولا كاذب.

فى دايرتنا هنستخدم افوميتر ونوصل سلكين بالشخص اللى حاين نستجوبه على مسافة ٢.٥ سم ومثبتهم بلزقة .. ونعدل قيمة المقاومة المتغيرة لحد ما مؤشر الافوميتر يثبت على الصفر وبعدين نجرب الدائرة بتوجيه اسئلة للشخص المراد استجوابه.



مخطط الدائرة




الادوات المطلوبة

م	البند	العدد
١	بطارية ٤.٥ فولت	٢
٢	مقاومة ٣٣ كيلو اوم	١
٣	مقاومة ١.٥ كيلو اوم	١
٤	مقاومة متغيرة ٥ كيلو اوم	١
٥	مكثف كيميائي ١ مايكرو فاراد	١
٦	ترانزستور 2N3565	١
٧	أفوميتر	١
٨	أسلاك توصيل	١
٩	لوحة اختبار	١



توصيل الدائرة



أكثر ما يدخل الجنة
تقوى الله وحسن الخلق
وأكثر ما يدخل النار
الفم والفرج



الفصل الثامن

الدوائر المتكاملة

الآي سي




الفصل الثامن : الدوائر المتكاملة

لو رجعنا بالسنين لورا هنلاقي ان اول نسخة من الموبايل كانت ضخمة جدا .. حجمها كبير و وزنها ثقيل .. سنة ورا سنة الموبايل بدأ حجمه يصغر لدرجة انه بقى يتلبس فى الايد فى صورة ساعة.



الكاميرا كمان .. اول من اخترعها كان العالم المسلم الحسن بن الهيثم فى صورتها البدائية وكان يسميها (قمره) بمعنى (غرفة) لانها كانت عبارة عن غرفة مظلمة ليها جانبين من ورق شفاف بعض الشيء واتحرف اسمها فيما بعد لـ (كاميرا) بالانجليزية زى كثير من الاختراعات والعلوم اللى عملها علماء مسلمين ومنها الجبر اللى اتحرف لـ (Algebra) و الكيمياء اللى اتحرفت لـ (chemistry) ..





الكاميرا كان حجمها كبير جدا في بداية تصنيعها و تداولها بشكل تجاري لحد ما بقت متوفرة بحجم زرار القميص وتقدر تشتريها بتكلفة بسيطة وتركبها في قميصك لتسجيل كل اللي بيحصل في يومك صوت وصورة لانها متوفرة بذاكرة ٨ جيجا بايت وبطارية قادرة على تشغيلها بالساعات وكل دا بتكلفة لا تتخطي ٣٠٠ جنيه!!

الكمبيوتر اللي بنستخدمه النهاردة كان شكله مضحك جدا من ٨٠ سنة!!




كان عبارة عن عدد كبير من الدواليب مليانة بدوائر إلكترونية وترانزستورات بأحجام مخيفة وكان بيخصص له مبني كامل مكون من ٣ غرف على الأقل منهم غرفة ضخمة لاحتواء الدوائر الإلكترونية وغرفة



لمنظومة التبريد الخاصة بيها و غرفة لمستخدم الكمبيوتر وكل دا كان بغرض القيام ببعض العمليات الحاسوبية البسيطة. بعكس النهاردة بقينا نشوف اجهزة كمبيوتر خارقة بأحجام بسيطة جدا والكمبيوتر بقى متوفر منه اشكال كثير منها المحمول ومنها اللي بحجم كف الايد ومنها الاصغر؛ وقدرة اضعفها اضعاف قدرة الكمبيوتر البدائى بملايين ومليارات المرات فيما يخص سرعة معالجة البيانات و مساحة الذاكرة.

ايه هي الدوائر المتكاملة؟

الدوائر المتكاملة او الاي سيهات ICs هي عبارة عن دوائر الكترونية عادية جدا و مختلفة فى استخداماتها لكن يتم تصنيعها كلها بحجم صغير جدا وتجميعها فى صورة عنصر واحد.



كلمة (**أى سى**) هي الاسم المتداول ليها وبنقول عليها باللغة العربية (**دوائر متكاملة - رقائف - رقايات**) وكلمة (**اى سى**) جت من اختصار اسمها باللغة الانجليزية اللي هو (**Integrated Circuits**) .. واختصارها بالانجليزية نفس النطق (**IC**).

احنا اخترعنا الاي سيهات لاسباب كتيرة جدا منها :

١- محتاجين **نصغر** حجم الدوائر الالكترونية قدر الامكان .. مش معقول نستخدم النهاردة كمبيوتر محتاج مبني علشان يشتغل !!

٢- **بتوفر** علينا وقت ومجهود ضخم لاننا لو بنعمل مشروع كبير مكون من عدة دوائر الكترونية فمممكن بدل تصميم كل دايرة لوحدها و تنفيذها وربطها بالدواير الثانية نستخدم مجموعة من الاي سيهات اللي بتقوم بنفس وظائف الدواير دي .. وبكدا نبقى وفرنا مجهود ضخم.

٣- **بتوفر** علينا **تكلفة كبيرة** . لان تكلفة بناء اي دائرة من عناصرها التقليدية (**مقاومات - مكثفات - ترانزستورات .. إلخ**) اعلى بكثير من تكلفة شراء الاي سى الخاص بيها بشكل مباشر.

٤- **سهولة الصيانة** : ودا لاننا لو صنعنا دايرة و باظت بعد فترة فبيبقى صعب علينا نفحص كل عنصر فيها ونشوف العطل فين بالظبط ونستبدل الجزء التالف. اما فى حالة استخدام الاي سيها فبسهولة بتقدر تعرف العطل فين و كل اللي عليك انك تغير الاي سى التالف و معظم الوقت بتقدر تغيره بدون اجراء اي لحامات لانه بيكون مثبت على قاعدة لسهولة الفك والتركيب.



- ٥- **بساطة التصميم** : تخيل كذا انك بتعمل دايرة باستخدام عناصرها التقليدية ولقيتها مكونة من ٦٠٠ عنصر مختلف؛ وصممت نفس الدايرة باستخدام الاى سيهات فبقى عدد العناصر عندك ٦ عناصر فقط .. متخيل مدي تعقيد الاولى و بساطة الثانية !!؟
- ٦- **الكفاءة** : كفاءة الاى سيهات اعلى بنحو ٥٠ مرة من كفاءة الدواير التقليدية.

خلينا ناخذ مثال علشان نستوعب الموضوع اكثر



البروسيسور اللى فى الصورة دا عبارة عن دايرة متكاملة .. او اى سى .. اصدار Core i7 من انتاج شركة انتل وطبعاً زى ماهو معروف ان البروسيسور دا بمثابة مخ الكمبيوتر.

طيب عارف البروسيسور دا فيه كام ترانزستور

!!؟ ٧٣١.٠٠٠.٠٠٠ ترانزستور (٧٣١ مليون ترانزستور) .. تخيل معايا اننا حيينا نصنع البروسيسور دا بالطريقة التقليدية .. اننا نجيب ٧٣١ مليون ترانزستور ونوصلهم ببعض من غير العناصر الثانية زى المقاومات والمكثفات والموحدات اللى فيه .. **تفتكر التكلفة هتبقى كام والحجم هيبقى قد ايه !!؟**

الاجابة ببساطة : التكلفة هتزيد عن ٣٠ مليون جنيه (سعره حوالى ١٥٠٠ جنيه) و الحجم هيزيد عن عمارة من ١٠ طوابق (**حجمه اصغر من علبة الكبريت**) !!



طيب تخيل انك فيه ترانزستور من الـ ٧٣١ مليون ترانزستور باظ و عطل الكمبيوتر تماما .. محتاج وقت قد ايه علشان تفحص كل الترانزستورات بحيث توصل للترانزستور التالف وتغيره !!؟

الاجابة : هتحتاج في المتوسط ٤٢ سنة (في حين ان تغيير البروسيسور لا يستغرق ٣ دقائق) .. وبالمناسبة بعد السنين دى كلها .. لو غيرت الترانزستور القديم هتلاقى ترانزستور في حته تانية باظ بفعل العوامل الجوية ومحتاج تعيد الفحص من اول وجديد !!

دا جدول بيوضح عدد الترانزستورات في مجموعة مختلفة من المعالجات (البروسيسور).

Microprocessors		
Designer	Transistor count	Processor
Intel	592,000,000	Itanium 2 with 9 MB cache
Intel	411,000,000	Core 2 Duo Wolfdale
Intel	731,000,000	Core i7 (Quad)
AMD	758,000,000	AMD K10 quad-core 6M L3


تعالى بقى نتعرف على اهم الاى سيهات اللى هنستخدمها في رحلتنا لتعلم الهندسة الالكترونية.



الدائرة المتكاملة 78XX

الدوائر الإلكترونية تختلف فى مواصفات الجهد والتيار اللى بتشتغل بيهم؛ فهتلاقى دوائر شغالة بجهد ٢٢٠ فولت و دوائر بجهد ٢٤ و ١٢ و ٩ و ٥ وغيرها من الجهود؛ لو حاولت تشغل دايرة بتشتغل بجهد ٢٢٠ فولت بمصدر قدرة ٤ فولت مستحيل تشتغل وتقدر تجرب دا بنفسك بتوصيل فيشة التليفزيون ببطارية الموبايل .. مستحيل يشتغل.

كذلك لو حاولت تشغل دايرة بتشتغل اساسا بجهد ١٢ فولت بمصدر مباشر للتيار الكهربى فرق جهده ٢٢٠ فولت هتشوف الدايرة بتتحرق ادام عينك ومش بعيد بعض العناصر تنفجر زى المكثفات!!



من هنا احتاجنا لعناصر تنظم الجهد و تثبته عند قيمة معينة وهو دا بالضبط اللى بتعمله الاى سيهات فى عيلة ال

78xx

عيلة ال 78xx مكونة من عدد كبير من الاى سيهات بتختلف باختلاف قيمة جهد الخرج المطلوب منها .. كلها بتتشارك فى رقم ٧٨ لكن بتختلف فى الرقمين اللى مكانهم XX .. بنحط مكانهم قيمة الجهد الخارج منها.


يعني مثلا الاى سى 7805 بيثبت الجهد عند ٥ فولت (الرقمين اللى على اليمين) .. والاى سى 7809 بيثبت الجهد عند ٩ فولت .. والاى سى 7812 بيثبت الجهد عند ١٢ فولت.



واهم استخدام للاى سى العظيم دا بيكون فى دواير الباور سبلاى اللى بتمد الاجهزة الكهربائية بالطاقة زى الكمبيوتر .. اللى فيه عناصر بتشتغل ب ٣ فولت و عناصر ب ٥ فولت و عناصر ب ١٢ فولت .. فى حين انه بيتم تغذيته بمصدر ٢٢٠ فولت (الكهرباء اللى فى الحيطه) .. علشان كذا بنلاقى اول حاجة واصلها كهرباء فى الكمبيوتر هى الباور سبلاى اللى بياخد ٢٢٠ فولت ويخرج ٣ و ٥ و ٩ و ١٢ فولت لكل عنصر من العناصر الموجودة فى الكمبيوتر زى الهارد ديسك والرامات و كارت الشاشة و البروسيسور وكارت الصوت وغيرهم.

بالرغم من الوظيفة العظيمة للاى سى دا الا ان سعره رخيص جدا لا يتجاوز ٢ جنيه ودا ارخص ١٠ مرات تقريبا من الدائرة الالكترونية التقليدية اللى بتقوم بنفس وظيفته.

طريقة توصيل الاى سى 78XX



- 1- جهد الدخل
- 2- الارضى
- 3- جهد الخرج

كل الاى سيهات من العيلة دى بتتوصل بنفس الطريقة وبشكل بسيط جدا؛ الطرف الشمال متوصل بجهد التغذية اللى محتاجين نقله لحد ما يوصل لجهد معين ثابت؛ الطرف اللى فى النص بيتوصل بالارضى .. والطرف اليمين بيتوصل بجهد الخرج الثابت.




مثال (٨-١)

اصنع دائرة باور سبلاى باستخدام بطارية ٩ فولت تقوم بتغذية دائرة محتاجة ٥ فولت.

الأدوات المستخدمة

م	البند	العدد
١	بطارية ٩ فولت	١
٢	اسلاك توصيل	١
٣	منظم جهد ٧٨٠٥	١

توصيل الدائرة



ملحوظة : ممكن تستخدم نفس الدائرة كشاحن للموبايل في الطوارئ

فقط!!



أحمد أبو الفتوح


مثال (٨-٢)

اصنع دائرة باور سبلاى ويتم تغذيتها من بطارية ٢٤ فولت بتخرج الجهود ٥ و ٩ و ١٢ و ١٥ و ١٨ فولت.

الأدوات المستخدمة

م	البند	العدد
١	بطارية ٢٤ فولت	١
٢	اسلاك توصيل	١
٣	منظم جهد ٧٨٠٥	١
٤	منظم جهد ٧٨٠٩	١
٥	منظم جهد ٧٨١٢	١
٦	منظم جهد ٧٨١٥	١
٧	منظم جهد ٧٨١٨	١

توصيل الدائرة



طيب لو انا محتاج تغذية ٥ فولت و تغذية -٥ فولت !!؟


لما بنحتاج تغذية سالبة بنلجأ لاستخدام عيلة تانية من مثبتات الجهد تعتبر اخت العيلة 78xx .. هي عيلة 79xx .. الفرق بينهم ان عيلة 78xx بتخرجنا جهد موجب وعيلة 79xx بتخرجنا جهد سالب.

مثال (٨-٣)

عايزين نعمل باور سبلاي يخرج ٥ و -٩ فولت

الأدوات المستخدمة

م	البند	العدد
١	بطارية ١٢ فولت	١
٢	اسلاك توصيل	١
٣	منظم جهد ٧٨٠٥	1
٤	منظم جهد ٧٩٠٩	١



توصيل الدائرة

هنتوصل الدائرة بنفس الطريقة لكن ترتيب اطراف المنظم ٧٩٠٩ هتختلف عن منظمات الجهد الموجبة



أحمد أبو الفتوح

عيوب عيلة 78xx و 79xx

١- عادة بنحتاج جهد دخل اكبر من الجهد المطلوب بـ ٢.٥ فولت على الاقل؛ والا الاى سى مش هيشغل بشكل مستقر؛ حاول توصل ٧٨٠٥ ببطارية ٦ فولت مش هيشغل !!

٢- قدرتها محدودة على تحمل التيار الكهربى؛ الاى سيهاات الاكثر شيوعا بتقدر تتحمل تقريبا ١ امبير؛ لو حاولت تمرر فيها اكثر من القيمة دي بتتلف بسهولة.

٣- بتسخن جدا خاصة لو غذيها بتيار قريب من اقصى تيار ممكن تتحملة؛ علشان كذا من الافضل انك تثبت فيها مبدل حراري Heat sink بحيث يبردها قدر الامكان.


ملحوظة : المبدل الحرارى عبارة عن عدة شرائح من الالومنيوم متوصلين ببعض ويتم تثبيته على العناصر الالكترونية اللى بيصدر عنها حرارة بحيث منوصلهاش لدرجة سخونة عالية وبالتالي تنحرق. فكرة الهيت سينك هي نفس فكرة ايد الطاسة؛ الطاسة بتكون سخنة جدا لكن ايدها باردة ونقدر نمسكها بسهولة؛ السبب ان مساحة سطح الايد بتكون كبيرة جدا وبالتالي بتقدر تتخلص من سخونتها بسرعة بعكس جسم الطاسة نفسه.



المؤقت ٥٥٥

واحد من اهم الاى سيهات اللى لازم يعرفها كل المهتمين بمجال الهندسة الالكترونية؛ على الرغم من سعره الرخيص (٢ جنيه تقريبا) و حجمه اللى اقل من نص حجم عقلة الاصبع الا انه يستخدم فى دواير كثيرة جدا ويوفر علينا مجهود بشع فى تصميم الدواير دى.


الاي سى ٥٥٥ عبارة عن مؤقت زمني ؛ بمعنى انه يقدر يتحكم فى توصيل التيار و فصله لفترات محددة وفقا لتصميم الدائرة . تم اختراعه لاول مرة من حوالى ٥٠ سنة و كانوا يسموه وقتها (آلة الزمن) .. تخيل دلوقتى مدي سهولة انك تعمل اشارة مرور شغالة اوتوماتيك بدون اى تدخل بشري .. كل اللى عليك انك تجيب ٣ مؤقتات ٥٥٥ و توصلهم بطريقة معينة بحيث تشغل اللون الاحمر لمدة دقيقة وبعدين اللون الاصفر لمدة ٥ ثواني وبعدين اللون الاخضر لمدة دقيقة.



شكل المؤقت ٥٥٥ المصنوع سنة ١٩٧١ من الداخل



ترتيب الاطراف و توصيفها



علشان تعرف تحدد رقم كل رجل (طرف) من أرجل المؤقت ٥٥٥ فانت هتشوف الدائرة الصغيرة الموجودة على سطحه وتبدأ عد الرجول من ناحيتها زي ما فى الصورة

شرح الاطراف :

١- أرضى

٢- **القادح او التريجر** : ودى رجل مهمة من رجول المؤقت ٥٥٥؛ لما بيوصلها جهد اقل من تلت جهد تغذية المؤقت بتتسبب فى خروج تيار على رجل الخرج رقم ٣ وبدا عداد الوقت. بمعنى اننا مثلا لو بنغذى المؤقت ب ٩ فولت؛ لما يوصل الجهد اللى داخل للقادح ل ٣ فولت هيخلي دورة الوقت تبدأ .. فمثلا رجل الخرج رقم ٣ هتطلع تيار كهربى لمدة دقيقة و بعدين تفصله لمدة ١٠ دقائق وترجع تاني تشغله دقيقة وتفصل ١٠ دقائق وهكذا.

٣- **الخرج** : ودى الرجل اللى بتتوصل بالعناصر التانية اللى حايبين نتحكم فيها واللى ممكن تبقى عناصر بتشغل اضاءة او حرارة او صوت او غيرهم. و عادة بيكون قيمة جهد الخرج على الرجل دى = جهد التغذية - ١.٧ فولت.

٤- **اعادة الضبط** : والطرف دا عادة بنوصله بالارضى (الرجل رقم ١) وفايده اننا لو حيبنا نبدأ دورة الوقت من الاول بندوس عليه ؛ بمعنى اننا



مثلا مضبطتين المؤقت انه يشتغل دقيقة ويفصل ١٠ دقائق .. وانا حبيت فى نص ال ١٠ دقائق انى ابدأ الدورة من الاول ويعد دقيقة التشغيل من اولها فى حين ان ال ١٠ دقائق لسة مخلصوش .. كل المطلوب منى انى ادوس عليه .. بنوصله عادة بالارضى علشان نتفادي اى احتمالية لاعادة ضبط الدائرة بالخطأ.

٥- **التحكم او الكنترول** : ودي ببساطة الرجل المسئولة عن ضبط توقيت المؤقت عن طريق توصيل مكثف ومقاومة قيمهم بتحدد زمن تشغيل وفصل الخرج ودا اللى هنتعلمه بعد كدا.

٦- **جهد العتبة** : ودي الرجل المسئولة عن فصل تيار الخرج على الرجل رقم ٣ .. وبرضو بيتم توصيلها بدائرة مكثف ومقاومة لضبطها.

٧- **رجل تفريغ الشحنات**.


٨- **رجل تغذية المؤقت** اللى بتتوصل بالجهد الموجب من ٤,٥ ل ١٥ فولت.

السؤال هنا بقى .. هل انت محتاج تذاكر الفقرة اللى فوق دى علشان تشتغل بالمؤقت ٥٥٥ !!؟

الاجابة: لا .. انت تقدر تنفذ اى دائرة بالموقت ٥٥٥ من غير ما تعرف الكلام دا كله .. كل اللى محتاج تعرفه ازاى تحدد ارقام الاطراف بحيث تعرف توصله بشكل مضبوط؛ لكن علشان تستوعب الموضوع بشكل اعرف فمحتاج تعرف التفاصيل دى.



مميزات المؤقت ٥٥٥



١- سعره رخيص.

٢- حجمه صغير.

٣- يشتغل بسرعة عالية جدا ممكن توصل لتردد ٥٠٠ كيلو هرتز ..
بمعني انه ممكن يغير يفتح ويقفل الخرج ٥٠٠ الف مرة فى الثانية الواحدة.

٤- تيار الخرج بيوصل لـ ٢٠٠ مللى امبير .. ودا كافى لتشغيل الريلاى او الكونتاكتور بشكل مباشر وبالتالي التحكم فى اجهزة كهربية كبيرة بقدرات عالية.

٥- مستقر جدا حتي مع تغير درجات الحرارة.

٦- ممكن ضبط زمن الفتح والغلق بسهولة بقيم تتراوح من ميكرو ثانية (جزء من المليون من الثانية) و عدة ساعات.

٧- يشتغل بجهود مختلفة من ٤.٥ لحد ١٥ فولت ودا معناه اننا ممكن نوصله بدواير ثانية كتير بتختلف فى جهد تغذيتها وجهد خرجها بدون حدوث مشاكل.



دوائر باستخدام المؤقت ٥٥٥

دائرة مكبر صوت


فى الدائرة دى هنستخدم مايكروفون لالتقاط الصوت وسماعة لتكبير الصوت باستخدام المؤقت ٥٥٥ وترانزستور BC547 و بأقل الامكانيات الممكنة.

الأدوات المطلوبة :

م	البند	العدد
١	مؤقت ٥٥٥	١
٢	مقاومة ٤٧ كيلو اوم	١
٣	مقاومة ٦٨٠ كيلو اوم	1
٤	مقاومة ١٠٠ كيلو اوم	١
٥	مقاومة ١٠ كيلو اوم	١
٦	مقاومة ١ كيلو اوم	١
٧	لوحة تجارب	١
٨	أسلاك توصيل	١
٩	مكثف ١٠٠ نانو فاراد	١
١٠	مكثف ١ نانو فاراد	١
١١	مكثف كيميائي ١ مايكرو فاراد	١
١٢	مكثف كيميائي ١٠ مايكرو فاراد	٢
١٣	ترانزستور BC574	1
١٤	سماعة ٨ اوم	١
١٥	مايكروفون الكتروني صغير	١
١٦	مصدر جهد مستمر ٥:١٥ فولت	١



مخطط الدائرة



الساعة ٨ اوم ٠.٥ وات ممكن
تستخرجها من لعبة قديمة بتحتوي
على دوائر صوتية و ممكن تشتريها
بتكلفة لا تتجاوز ٥ جنيهات من
محلات القطع الالكترونية و قطع
غير التلفزيون والراديو.

أما عن الميكروفون الالكتروني فيكون عنصر
صغير الحجم موجود فى الالعاب اللى فيها
مايكروفونات زى الاورج و مكبرات الصوت و
ممكن تجيبه من نفس المحلات بسعر لا يتجاوز ٢
جنيه.



دائرة مضاعف جهد

مضاعفات الجهد بنحتاجها في اوقات كثير جدا؛ على سبيل المثال الانفرتر اللى في العربية واللى بيتوصل ببطاريتها الـ ١٢ فولت جهد مستمر و يخرجنا ٢٢٠ فولت جهد متردد علشان نقدر نشتغل بيه الاجهزة الكهربائية الشائعة زي التليفزيون والمروحة والتلاجة.


في الدائرة دي هنقدر نضاعف جهد الدخل مرتين لكن هنطرح منه تقريبا ١.٥ فولت او ٢ فولت زي ما شرحنا قبل كذا .. ونقدر كمان نضاعف جهد الخرج للدائرة دي باننا نعمله دخل لمؤقت تاني وهكذا.

الأدوات المطلوبة :

م	البند	العدد
١	مؤقت ٥٥٥	١
٢	مقاومة ٣٣ كيلو اوم	١
٣	محدد (دايمود) 1N4004	2
٤	مصدر جهد مستمر ٥:١٥ فولت	١
٥	لوحة تجارب	١
٦	أسلاك توصيل	١
٧	مكثف ١٠٠ نانو فاراد	١
٨	مكثف ١ نانو فاراد	١
٩	مكثف كيميائي ٢٢ مايكرو فاراد	٢



مخطط الدائرة



ملحوظة هامة

مفيش اي مشكلة فى التعامل مع الجهود الصغيرة زي ٥ و ١٥ فولت؛ لكن المشكلة بتكون فى التعامل مع الجهود الكبيرة اللي بتستوجب الحذر التام اثناء التعامل معها خاصة بالنسبة للاطفال؛ علشان كذا لو قررت تضاعف الجهد كمان مرة هتحتاج تلبس جوانتي عازل و تلبس حذاء غير موصل للتيار الكهربى فى رجليك و تقعد على كرسي خشب لحماية نفسك من خطر الصعق بالكهرباء.




دائرة حساس ضوء

بالرغم من اننا قدرنا نعمل الدائرة دي فى الفصل اللى فات بمكونات ابسط لكن الدائرة اللى هنعملها المرادي مستقرة اكثر من الثانية بكثير ويمكن الاعتماد عليها اكثر فى بيئات عمل قاسية لحد كبير؛ بالاضافة الى انها بتديك انذار صوتي فى حال حال احساسها بالضوء.

م	البند	العدد
١	مؤقت ٥٥٥	١
٢	مقاومة ١٠ كيلو اوم	١
٣	مقاومة ٢٢ كيلو اوم	1
٤	مقاومة ضوئية	١
٥	مقاومة ٤٧ كيلو اوم	١
٦	مقاومة متغيرة ١٠٠ كيلو اوم	١
٧	لوحة تجارب	١
٨	أسلاك توصيل	١
٩	مكثف ١٠٠ نانو فاراد	١
١٠	مكثف ١٠ نانو فاراد	١
١١	مكثف كيميائي ١٠ مايكرو فاراد	٢
١٢	سماعة ٨ اوم	١
١٣	مصدر جهد مستمر ٥:١٥ فولت	١



مخطط الدائرة



ملحوظة :

احنا استخدمنا المقاومة المتغيرة اللي قيمتها ١٠٠ كيلو اوم هنا بهدف ضبط حساسية الدائرة للضوء؛ فمثلا لو هنستخدمها كمنبه ممكن نضبطها على كمية الضوء اللي بيكون موجود الساعة ٥ او ٦ او ٧ صباحا؛ كمان احيانا بنحتاج نخلي حساسيتها ضعيفة جدا للضوء بحيث متتأثرش بأى ضوء بسيط فى غرفة مظلمة زي ضوء الموبايل مثلا. و احيانا بنحتاج نخلي حساسيتها قوية جدا لو هنستخدمها كدائرة انذار من السرقة باننا نحطها فى غرفة مظلمة وبمجرد فتح الباب تستشعر الضوء اللي جاي من برا فتدينا انذار.



دائرة كاشف معادن


الفكرة الاساسية فى كشف المعادن هى انها بتعمل تغير فى المجال الكهرومغناطيسي لملفات النحاس لما تتقاطع معاها ؛ بعكس الاخشاب او البلاستيك او الورق مثلا .. ومن هنا قدرنا نصنع دوائر كشف المعادن ومنها الدائرة البسيطة دى اللى بتعتمد على مؤقت ٥٥٥ و ملف نحاسي.

الادوات المطلوبة

م	البند	العدد
١	مؤقت ٥٥٥	١
٢	مقاومة ٤٧ كيلو اوم	١
٣	مقاومة متغيرة ١٠٠ كيلو اوم	١
٤	لوحة تجارب	١
٥	أسلاك توصيل	١
٦	ملف نحاس ٢٥٠ لفة	١
٧	مكثف كيميائي ١٠ مايكرو فاراد	١
٨	مكثف كيميائي 2.2 مايكرو فاراد	٢
٩	سماعة ٨ اوم	١
١٠	مصدر جهد مستمر 6:12 فولت	١




مخطط الدائرة



تصنيع الملف النحاسي سهل جدا ؛ كل اللي محتاجه انك تجيب بكرة سلك نحاس بدون عازل بلاستيك بقطر ٠.٢ مم ودا متوفر فى محلات الالكترونيات و هنعمل دواير من الكرتون بالشكل اللي فى الصورة قطر الدائرة اللي فى النص ٩٠ سم ونلف حواليها سلك النحاس ٢٥٠ لفه.



ممكن باستخدام كرتونة قديمة تعمل مجسم كامل لكاشف المعادن بحيث الملف يكون فى نهايته و الالكترونيات تكون بعيدة عنده ومثبتة على ايد الكاشف ..



ممكن كمان تستبدل دوائر الكرتون باسطوانات قديمة تالفة و تستبدل يد كاشف المعادن الكرتونية بهيكل عمله من مواسير بلاستيكية وتحفظ الدائرة الاكترونية فى علبة بلاستيكية صغيرة .. فى النهاية هتحصل على كاشف معادن بشكل احترافى اكثر.



دائرة طرد الناموس!!



الصوت عبارة عن موجات مادية يتمشى فى الهواء والسوائل والمواد الصلبة؛ حاجة كذا شبيهة بموج البحر لكن مبنشوفهاش لانها بتكون صغيرة جدا جدا فصعب ملاحظتها .. وان كنا احيانا بنقدر نشوفها لو حطيت كاس ماء جنب

سماعات كبيرة .. هتلاحظ ان المية بتعمل امواج صغيرة جوة الكاس ..

الموجات دى ليها ترددات مختلفة .. فمثلا الرجال بيكون صوتهم اتخن من النساء ؛ دا لان تردد صوت الرجال بيكون صغير وتردد صوت النساء بيكون كبير .. احنا كبشر بنقدر نسمع الموجات الصوتية اللى تردداتها من ٢٠ ل ٢٠ الف ذبذبة فى الثانية .. اما الكائنات الحية الثانية فبتقدر تسمع حاجات اقل واعلى من كذا ..

ودا يفسرلك السبب اللى بيخلى الكلاب مثلا تحس بالزلازل قبل ما نحس احنا بيها .. لانها بتسمع اصوات تحرك طبقات الارض فى الوقت اللى احنا بنكون غير قادرين على سماعها لانها خارج نطاق الترددات اللى بنقدر نسمعها.


ومن هنا جت فكرة اننا نضع دوائر صوتية بتعمل ترددات عالية جدا جدا مبنقدرش احنا كبشر نسمعها لكن فيه كائنات حية تانية بتقدر تسمعها .. الاصوات دى بتكون مزعجة جدا ليها بالظبط زى ما يكون فيه حد يبصرخ فى ودنك .. فبتضطر تسبب المكان اللى فيه الصوت المزعج وتهرب ..




الادوات المطلوبة

م	البند	العدد
١	مؤقت ٥٥٥	١
٢	مقاومة ١ كيلو اوم	١
٣	مقاومة متغيرة ١ ميغا اوم	١
٤	لوحة تجارب	١
٥	أسلاك توصيل	١
٦	مكثف ٤.٧ نانو فاراد	١
٧	مكثف ١٠ نانو فاراد	١
٨	سماعة ٨ اوم او بيزو	١
٩	مصدر جهد مستمر 6:12 فولت	١

مخطط الدائرة




عنصر البيزو Peizelectric يستخدم في معظم لعب الاطفال كسماعات لكنه يختلف عن السماعات التقليدية في انه مفيهوش ملف نحاسي.



فكرة العنصر دا انه بيكون مكون من طبقتين من معادن مختلفة فوق بعض؛ لما بنوصله تيار كهربى بيتسبب فى تقوس المعدنين بدرجات مختلفة فيعمل اهتزازات بنحصل منها على صوت او غيره من التطبيقات الثانية ؛ ولو عكسنا العملية و حاولنا نقوسه هيولد تيار كهربى بسيط.

دائرة اشارة المرور




فى الدائرة دي بنوصل ٣ ليدات بألوان اشارة المرور (الاحمر - الاصفر - الاخضر) وعن طريق ٢ من المؤقت ٥٥٥ بنقدر نتحكم فى زمن اضاءة كل ليد فيهم بالتتابع.



الادوات المطلوبة

م	البند	العدد
١	مؤقت ٥٥٥	٢
٢	مقاومة ٢٢٠ اوم	٢
٣	مقاومة ٤٧٠ اوم	١
٤	مقاومة ١٠٠ كيلو اوم	١
٥	مقاومة ٤٧ كيلو اوم	١
٦	مكثف كيميائي ١٠٠ مايكرو فاراد	٢
٧	لوحة تجارب	١
٨	أسلاك توصيل	١
٩	ليد احمر	١
١٠	ليد اصفر	١
١١	ليد اخضر	١
١٢	مصدر جهد مستمر 6:12 فولت	١

مخطط الدائرة




دائرة التشويش على الريموت كنترول



لو مسكنا ريموت كنترول التليفزيون ..
الريسيفر .. التكييف .. هتلاقية فيه ليد
صغير من ادم .. لكنه ميينورش خالص!!

الحقيقة انه فعلا ليد وبينور لكن بيطلع
اشعة تحت حمراء العين مبتقدرش
تشوفها لان عيوننا بتقدر تشوف اطياف
معينة من الالوان اقلها فى التردد

الاحمر و اعلاها البنفسجي .. علشان كذا بنقول ان فيه اشعة تحت حمراء و
اشعة فوق بنفسجية والاتنين مبتقدرش نشوفهم .



صورة بتوضح تدرجات الالوان المرئية من الاحمر للبنفسجي .. هي نفسها
ألوان قوس قزح



تجربة

اكتشاف الاشعة تحت الحمراء

الادوات المستخدمة

م	البند	العدد
١	ريموت كترول اى جهاز	١
٢	كاميرا او موبايل بكاميرا	١

لو حابب تشوف الاشعة تحت الحمراء هات الريموت كترول واضبط على اى زرار و صور الليد اللى فيه بموبايلك وانت ضاغط .. هتقدر تشوف ضوء احمر بتحس بيه الكاميرا اللى فى الموبايل.



الريموت فكرة عمله بسيطة جدا .. لما بتضغط على اى زرار بيبعث شفرة معينة عن طريق ضوء ليد الاشعة تحت الحمراء اللى فيه .. فيستقبله عنصر مشابه له فى الجهاز اللى بتتحكم فيه بيلتقط الضوء دا ويحوله لاشارة كهربية فينقل الشفرة له ويفهم ايه المطلوب منه.

طيب ايه حدوة التشويش !!؟

فكرة اجهزة التشويش انها بتبعث نفس نوع الاشارة اللى فى الهواء بقدرة اعلى من الاشارة الاصلية فبالتالى اجهزة الاستقبال متقدرش تفهمها . بالظبط زى ما تكون بتتكلم بصوت منخفض و حد يبجي جنبك ويصرخ جامد .. مستحيل اللى بتكلمه هيسمعك ..

نفس الفكرة بتطبق فى التطبيقات العسكرية والامنية .. قضيت فترة من حياتي فى شارع صلاح سالم وكان الرئيس بيمر ادامنا كل يوم الصبح؛ وكان ضمن الموكب بتاعه عربية عليها عدد كبير جدا من الهوائيات بتقوم بالتشويش على كل انواع الاتصالات اللاسلكية الموجودة فى المنطقة .. فثناء مرورها بتتعطل الموبايلات تماما وبنقدرش نتصل او نستقبل اتصال .



نفس العربية دي بيستخدموها للتشويش على القنابل اللي بيتم تفجيرها عن بعد من خلال ريموت كترول؛ ودا لانها بتحول دون ارسال امر التفجير لاسلكيا بين الريموت كترول اللي مع الارهابي و دايرة الاستقبال فى القنبلة بتاعته.


يلا بينا نعمل دايرة التشويش

الادوات المستخدمة

م	البند	العدد
١	مؤقت ٥٥٥	٢
٢	مقاومة متغيرة ١٠ كيلو اوم	٢
٣	مقاومة ٤٧٠ اوم	١
٤	مقاومة ١ كيلو اوم	١
٥	مقاومة ٥.٦ اوم	١
٦	ليد اشعة تحت حمراء (انفرا ريد)	١
٧	مكثف ١٠ نانو فاراد	١
٨	ترانزستور BC547	1
٩	دايود 1N4148	2
١٠	أسلاك توصيل	١
١١	لوحة تجارب	١
١٢	بطارية ٩ فولت	١



مخطط الدائرة



من أعظم نعم ربنا علينا انه اذانا فرصة للرجوع له فى اى وقت
فى اى وقت نقدر نرجع لربنا .. كل اللى محتاجينه اننا نندم على
الذنب اللى عملناه .. نعاهد ربنا على عدم الرجوع له مرة ثانية
.. ولو كان الذنب دا فى حق حد نرجعله حقه ..

دايما باب التوبة مفتوح .. **وبمجرد تقبل ربنا لتوبتك ييمحي
ذنبك تماما ..** ايا كان حجم الذنب ..

حتي لو كان ذنبك ترك الدين تماما .. بمجرد رجوعك للاسلام
فكل اللى حصل فى حياتك قبلها بيتمسح بأستيكة ..

لكن خذ بالك من نقطة مرعبين جدا .. ان **قبول التوبة مشروط
بالندم ..**

لازم تكون مخلص فى طلبك بالمغفرة .. وكمان
انا وانت منضمنش هنموت امتى .. **و يا ويلنا لو
موتنا فجأة على ذنب قبل ما نتوب منه ..**




الفصل التاسع

الدوائر المطبوعة




الفصل الثامن : الدوائر المتكاملة

فى الفصول اللى فاتت اتعلمنا نعمل دواير الكترونية باستخدام البريد بورد او لوحة التجارب؛ الهدف الاساسي من استخدام لوحة التجارب اننا نتعلم ونجرب بأقل تكلفة. لكن لو حيينا نضع دوائر الكترونية هنستخدمها بشكل دائم فلانم نعمل دوائر مطبوعة زى اللى موجودة فى كل الاجهزة الالكترونية وبيكون لونها فى الغالب اخضر و مثبتت عليها العناصر الالكترونية بمنتهى الحرفية. ودا اللى هنتعلمه فى الفصل دا ان شاء الله.



دائرة مطبوعة : اللوحة الام لموبايل سامسونج s4

البوردة اللى بتتصنع منها الدوائر المطبوعة بتكون عبارة عن لوح من الفايبر الغير موصل للكهرباء عليه طبقة من النحاس. الفكرة فيها اننا



بنرسم مسارات بالنحاسس بتوصل بين عناصر الدائرة المختلفة علشان تحقلنا التصميم المطلوب للدائرة وبالتالي تشتغل بكفاءة عالية. ازاي بنرسم المسارات دي !!؟

عندنا ٣ طرق رئيسية لتصنيع الدوائر المطبوعة :-

- ١- التحميض البسيط.
- ٢- التحميض الضوئي.
- ٣- التشغيل الميكانيكي.

التحميض البسيط

وفى الطريقة دي بنطبع الدائرة المطلوب تنفيذها على ورق جلوسى او ورقة من اى مجلة باستخدام طابعة ليزر عادية جدا؛ بعدها بنقل الطباعة على البوردة باستخدام مكوة عادية (ويفضل استخدام المكوات القديمة)؛ وبعدين نحط البوردة فى حمض معين بيتفاعل من النحاس و يشيله من على الفايبر ما عدا النحاس اللى تم تغطيته بالحبر لانه مش هيقدر يوصله.



يلا نشوف مع بعض الخطوات بالصور..

الخطوة الاولى : تحضير البوردة


هنجيب البوردة ونقطع منها جزء صغير على مقاس الدائرة الالكترونية اللى عايزين نصنعها؛ بعدها هنستخدم صنفرة ناعمة او سلك غسيل الاطباق فى اننا نصنفر الطبقة النحاس بحيث تكون نضيفة جدا و مفيش عليها اى تراكم لدهون او اتربة.

صورة ٢	صورة ١
	
الصنفرة	التقطيع

الخطوة الثانية : طباعة الدائرة الالكترونية

هنطبعتها باستخدام طابعة ليزر ابيض واسود او الوان .. المهم تكون ليزر مش انك جيت .. ويفضل اننا نطبعتها على ورق جلوسى او تقطع ورقة من اى مجلة وتطبع عليها.. دا بيدينا نتائج افضل بكثير.





الخطوة الثالثة : نقل الطباعة الى سطح النحاس

هنجيب الورقة اللي طبعتها و نثبتها على البوردة النحاس بحيث تكون الطباعة على النحاس مباشرة؛ بعدها هنجيب منديل نطه على الورقة والبوردة و نمشى بالمكوة عليها مع الضغط؛ الحرارة والضغط هينقلوا الحبر من سطح الورقة لسطح النحاس.








الخطوة الرابعة : التنظيف

بعد نقل الحبر لسطح النحاس نحتاج اننا نشيل الورقة اللي طبعنا عليها الدائرة فى الاول؛ عادة بتكون صعب نزعها من سطح النحاس علشان كذا بنحط البوردة فى علبة فيها ماء ١٠ دقائق وبعدين نفرکها. ولو احتاجت نلقطها تاني فى ماء بنلقطها.







الخطوة الخامسة : التحميض


بعد تجهيز البوردة و نقل الطباعة ليها بننقعها فى علبة فيها حمض مناسب بحيث يتفاعل مع النحاس ويسبب تآكل الاجزاء المكشوفة منه اللي مش متغطية بالحبر.



احماض كثير ممكن نستخدمها زي مية النار البسيطة المنتشرة وممكن نزودلها ماء اكسجين علشان تسرع التفاعل؛ بالاضافة لفلاش منظف الارضيات ؛ وممكن تعمل محلول فعال جدا فى تحميض الدوائر الالكترونية من كويين حمض الهيدروكلوريك + كوب ماء الاكسجين + ٦ اكواب ماء للتخفيف.


ملحوظة هامة جدا : التعامل مع الاحماض خطير فلزام نبقى واخدين بالناس كويس جدا من حركتنا و اماكن الاحماض ونلبس جوانتي لما نشغل بيها



ونحاول قدر الامكان انها متقعش على الارض او اى حاجة؛ اما بالنسبة للاطفال فممنوع تماما التعامل مع الاحماض الا بوجود حد كبير. وحاول متشمش الابخرة اللى طالعة من التفاعل لانها مضره على الرئة.











بعدها هنزيل الحبر باستخدام سلك غسيل اطباق او صنفرة.




الخطوة السادسة : التشقيب

بعد الانتهاء من التحميض بنستخدم شنيور صغير جدا او ميني كرافت مع بونطة ١ مم لعمل ثقوب فى اماكنها على البوردة علشان نقدر نثبت العناصر الالكترونية بتاعتنا.



الخطوة السابعة : تركيب العناصر



اكتب ملاحظتك هنا

Blank area for notes, consisting of 12 horizontal gray bars.



الدين كله يتلخص فى سورة العصر

((وَالْعَصْرُ * إِنَّ الْإِنْسَانَ لَفِي خُسْرٍ * إِلَّا الَّذِينَ آمَنُوا وَعَمِلُوا الصَّالِحَاتِ وَتَوَاصَوْا بِالْحَقِّ وَتَوَاصَوْا بِالصَّبْرِ))

٤ مراحل لاتمام دينك ..

- ١- الايمان : ودا لازم معاه العلم .. مش معقول هنؤمن بشيء نجهله.
- ٢- العمل : العمل جزء من الايمان .. الايمان يزيد و ينقص .. يزيد بالطاعات و ينقص بالمعاصى.
- ٣- الدعوة : التواصي بالحق .. الامر بالمعروف والنهي عن المنكر.
- ٤- الصبر : يتلى المؤمن على قدر ايمانه .. الابتلاء ممكن يجيلك فى اشكال كتير جدا .. ممكن تبلى بالشىء وعكسه .. مثلا ممكن تبلى بالفقر وممكن تبلى بامتلاكك ملايين الدولارات!! .. بل ان الابتلاء بالنعمة يمكن معظم الوقت اصعب من الابتلاء بالمصيبة.



تم بحمد الله ..